

二十一史論贊

リ 8
1899
12



1899
12

新唐書小引

唐故有舊史韋述劉昫之所撰也歐陽公新唐書成表語
有事增文省之言劉元城聞而譏之是矣夫史之所貴在
文不加煩而事自明新書之病正以文雖省而事則鬱而
不彰耳且夫文章豈有繁簡也意必欲多則冗長而不足
讀必欲其簡則僻澁令人不喜以是爲言此作史之弊也
然考之當日原非公一手實合衆賢之長若方鎮百官表
出于楊公堯臣律曆五行志出于劉公義叟列傳出于宋



新唐書小引

公祁而紀志則公自爲之宋公嘗曰唐人詔令皆對偶之
文入史策如粉黛飾壯士笙匏佐鼓聲似非所宜推乎此
言則知裁省之意非獨公云爲然矣議者致以兒童之見
訶之母乃太甚余偶閱野老記聞或問新唐書與史記所
以異告之曰不辨可也唐書如近世許道寧輩畫山水是
真畫也太史公如郭忠恕畫天外數峰略有筆墨然而使
人見而心服者在筆墨之外也噫此真二家之定評也迺
余讀歐公諸贊論其清音幽韻凄如飄風急雨之驟至其

雄辭閎辨快如輕車駿馬之奔馳屈伸變化又非尋行數
墨可得其形似者若夫書之新舊各有長短未易優劣也

古吳沈國元飛仲題



二十一史論贊目錄

古吳 沈國元 飛仲 批選 子 沈 琦 韓來 較

甘陵 周承芳 燦甫 全閱 瀛海 范為極 惟立 全叅

廣川 沈 嘉無謀 壽陽 方育馨 懷蘭

唐書

本紀

高祖

太宗

高宗

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十

天后

睿宗玄宗

肅宗

德宗順宗憲宗

穆宗敬宗文宗武宗宣宗

懿宗僖宗

昭宗哀帝

志

禮樂

儀衛

天文

五行

地理

選舉

百官

兵志

食貨

刑法

二
一
史
論
續

唐書目錄

二

大來堂

藝文

表

宰相

方鎮

宗室世系

宰相世系總論

列傳

后妃

宗室

三宗諸子

十一宗諸子

諸公主

李憲

王世充竇建德

劉文静裴寂

屈突通尉遲敬德張公謹秦瓊唐儉改志雲

劉弘基殷開山劉政會許紹程知節柴紹任瓌丘和

李靖李勣

侯君集張亮薛萬均威彥師盧祖尚劉世讓李君羨

高儉

高儉竇威

房玄齡杜如晦

魏徵

馬周

薛收

劉洎

封倫裴矩宇文士及

蕭俛

蕭瑀

姚思廉

岑文本虞世南李百藥褚亮姚思廉令狐德芬

蘇世長韋雲起孫伏伽張玄素

于志寧高馮張行成

長孫無忌褚遂良韓瑗耒濟上官儀

傅奕呂才陳子昂王無競

劉仁軌裴行儉婁師德

諸夷番將

郭孝恪王方翼程務王孝傑唐璿張仁愿王悛

狄仁傑郝處俊朱敬則

裴炎劉禕之魏玄同李昭德吉頊

韋見素

張廷珪韋湊韓思復辛替否李裴潁李中敏李甘

徐有功

白居易

五王

劉幽求鍾紹京崔日用王琚王毛仲

魏死忠韋安石郭震

李嶠蕭至忠盧茂用韋巨源趙彥昭和逢堯

姚崇宋璟

蘇環張說

魏知古張九齡

張嘉貞源乾曜

崔隱甫

宗室宰相

二十一 史論續

官書目錄

五

劉知幾吳兢韋述蔣乂柳芳沈既濟傅師

王忠嗣

宇文融韋聖楊慎矜王鉷楊國忠

哥舒翰高仙芝封常清

李光弼

郭子儀

房琯

李泌

崔圓苗晉卿裴冕裴遵慶

崔植崔俊

楊綰崔佑甫柳渾韋處厚路隋

元載楊炎王縉竇參

李栖筠李鄘

劉晏第五琦班寵王紹李巽

關播董晉

張鑑武元衡李絳姜公輔宋申錫

段秀實顏真卿

李愬

李晟

馬燧 渾瑊

陸贄

韋臯 張建封 嚴震 韓弘

段平仲

孔巢父 禳寧 崔邠 柳公綽

歸崇敬

鄭珣 瑜 高郢

崔羣

賈耽 杜佑 杜牧 杜棕 令狐楚 令狐綯

裴延齡 韋渠牟 皇甫鎛

王叔文 王伾 劉禹錫 柳宗元

杜黃裳 裴均 李藩 韋貫之

劉昌

李光顏

裴度

牛僧孺 李宗閔

竇羣 劉栖楚 柏耆

韓愈

劉蕡

李訓鄭注王涯賈鍊舒元興

李德裕

李蔚

李珣

鄭縈朱朴韓偓

盧攜

鄭畋王鐸張濟

趙匡凝

王重榮

楊行密

高仁厚田頔朱延壽

忠義

孝友

隱逸

循吏

儒學

啖助

陳京

文藝

杜甫

方技

列女

外戚

宦者

馬存亮

宦者傳後

酷吏

藩鎮

魏博

鎮冀

盧龍

宣武彰義澤潞

突厥

吐蕃

二十一 史論續 唐書目錄 十

回鶻

沙陀

契丹

東夷傳張保皋

西域

南蠻

姦臣

叛臣僕固懷恩李懷光

叛臣李錡

逆臣

逆臣黃巢

逆臣傅末

二十一 史論續

唐書目錄

十

宋 歐陽修 撰 明 沈國元 閱

本紀

高祖 李姓名淵成紀人都長安

○德字為一篇○綱領

自古受命之君非有德不王自夏后氏以來始傳以世而有賢有不肖故其為世數亦或短或長論者乃謂周自后稷至於文武積功累仁其來也遠故其為世尤長朕考於世本夏商周皆出於黃帝夏自鯀以前商自契至於成湯其間寂寥無聞與周之興異矣而漢亦起於亭長叛亡之後及其興也有天下皆數百年而後已

由是言之。天命豈易知哉。朕考其終始。治亂顧其功德。有厚薄與。其制度紀綱。所以維持者如何。而其後世或寢以隆昌。或遽以壞亂。或漸以陵遲。或能振而復起。或遂至於不可支持。雖各因其勢。朕有德則興。無德則絕。豈非所謂天命者常不顯其符。而俾有國者兢兢以自勉耶。唐在周隋之際。世雖貴矣。朕烏有所謂積功累仁之漸。而高祖之興。亦何異因時而起者歟。雖其有治有亂。或絕或微。朕其有天下。年幾三百。可謂盛哉。豈非人歟。隋亂而蒙德。治而宗之。治制度紀綱之法。後世有以憑籍扶持。而能永其

陳本叔曰。經緯相宣。不見其機杼之迹。歸義雅正。所以推為一代鉅公。王劭輩真蠖螾哉。

新唐書。歐宋二公所撰也。朕方鎮百官表。出於楊公堯臣。律曆五行志。出於劉公義叟。列傳出於宋公祁。而紀志則公自成之。其進表有云。其事則增於前。其文則省於舊。劉元城譏為失言。蓋有以窺其微矣。

太宗 名世民 高祖次子

唐有天下傳世二十其可稱者三君。玄宗憲宗皆不克其終。盛哉
 太宗之烈也。其除隋之亂。比迹湯武。致治之美。庶幾成康。自古功
 德兼隆。由漢以來未之有也。至其牽於多愛。復立浮圖。好大喜功。
 動兵於遠。此中材庸主之所常為。朕春秋之法。常責備於賢者。是
 以後世君子之欲成人之美者。莫不歎息於斯焉。
 沈及堯曰。祖法春秋。名史之識。
 紀載之失。從古而然。往牒稱成康之際。天下太平。刑措四十餘
 年。不用此言。致治之美。庶幾成康矣。迺刑志云。太宗四年。天下

斷罪二十九人而六年遷至於犯死罪者三百九十人前後何
自矛盾至此又隱逸序言避丘園而不返而陵羽之操持茶旦
出入公卿亦與其選不大廷庭乎推而上之若神農矣帝本一
君也而封禪書析為二代子士會本一人也兩古今人表列為
二等茲非學術之未精乎固志天文嘗以箕參於益州分野奚
於地理則又係之於秦而併屬於東井鬼鄉茲非推究之不審
乎以董宣之忠鯁不屈暨之酷吏以蔡瑛之忠吐妻胡乘之列
女則所謂論以無據者非誣暉矣此類甚多難以縷舉姑以所
竊著者附辨於茲

高宗 名治 宋第九子

小雅曰赫赫宗周褒姒滅之此周幽王之詩也是時幽王雖亡而
太子宜臼立是為平王而詩人乃言滅之者以為文武之業於是
蕩盡東周雖在不能復興矣其曰滅者甚疾之之辭也武氏之亂
唐之宗室戍殺殆盡其賢士大夫不免者十八九無○限○依○徊○感○情以宋之治其
道德餘烈在人者未遠而幾於遂絕其為惡豈一褒姒之比邪以
宋之明昧於知子廢立之際不能自決卒用昏童高宗溺愛稚
席不戒履霜之漸而毒流天下貽禍邦家嗚呼父子夫婦之間可
謂難哉可不慎哉

文字要着來龍結穴。以太宗之治。以太宗之明。二語是為來龍。嗚呼。一東是為結穴。雖係小篇。不廢大構。歐史之所以單行。良有故也。

天后

昔者孔子作春秋而亂臣賊子懼。其於弑君篡國之主。皆不點絕之。豈以其盜而有之者。莫大之罪也。不沒其實。所以著其大惡。而不隱歟。自司馬遷班固皆作高后紀。呂氏雖非篡漢而盜執其國。政遂不敢沒其實。豈其得聖人之意歟。抑亦偶合於春秋之法也。
唐之舊史因之列武氏於本紀。蓋其所從來遠矣。武后之惡不及於大戮。所謂幸免者也。至中宗韋氏則禍不旋踵矣。朕其親。竄母后之難。而躬自蹈之。所謂下愚之不移者歟。
彭成學曰：嚴例深文。亂賊見之。能無汗悸。

二十一 史記卷一百一十五 卷一百一十五 睿宗玄宗

睿宗玄宗

睿宗名旦中宗弟玄宗名隆基睿宗第三子

實心透骨之言

睿宗因其子之功而在位不久固無可稱者嗚呼女子之禍於人者甚矣自高祖至於中宗數十年間再罹女禍唐祚既絕而復續中宗不免其身韋氏遂已滅族玄宗親平其亂可以鑒矣而又敗以女子方其勵精政事開元之際幾致太平何其盛也及侈心一動窮天下之欲不足為其樂而溺其所甚愛忘其所可戒至於竄身失國而不悔考其始終之異其性習之相遠也至於如此可不慎哉可不慎哉

辭婉情剛警聳處都在開合轉落之間味之自得

二十一 史記卷一百一十五

卷一百一十五 睿宗玄宗

六

大宋堂

二十一 史記卷一百一十五 卷二十一 肅宗

肅宗 名亨 玄宗子

天寶之亂大盜遽起天子出奔方是時肅宗以皇太子治兵討賊真得其職矣朕以僖宗之時唐之威德在人紀綱未壞孰與天寶之際而僖宗在蜀諸侯之兵糾合戮力遂破黃巢而復京師由是言之肅宗雖不即尊位亦可以破賊矣蓋自高祖以來三遜於位以授其子而獨肅宗上畏大戒發於誠心若高祖玄宗豈其志哉代宗之時餘孽猶在平亂守成蓋亦中材之主也秦石枕曰風刺隱朕皆有裨於人紀

二十一 史記卷一百一十五 肅宗 七 大來堂

十一 史記 卷之十一 十一

德宗順宗憲宗 德宗名造代宗子 順宗名誦德宗子

德宗猜忌刻薄以疆明自任耻見屈於正論而忘受欺於姦諛故
其疑蕭復之輕已謂姜公輔為買直而不能容用盧杞趙贊則至
於敗亂而終不悔及奉天之難深自懲艾遂行姑息之政由是朝
廷益弱而方鎮愈疆至於唐亡其患以此憲宗劉明果斷自初即
位慨然發憤志平僭叛能用忠謀不惑羣議卒收成功自吳元濟
誅疆藩悍將皆欲悔過而效順當此之時唐之威令幾於復振則
其為優劣不待較而可知也及其晚節信用非人不終其業而身
罹不測之禍則尤甚於德宗嗚呼小人之能敗國也何必愚君暗

十一 史記 卷之十一 十一 德宗 順宗 憲宗 誦 德宗子 順宗子

主雖聰明聖智苟有惑焉未有不為患者也昔韓愈言順宗在東宮二十年天下陰受其賜朕享國日淺不幸疾病莫克有為亦可悲夫

陳竟茲曰前論女子禍人此論小人敗國皆補衮名言書稱憲宗志平僭叛過矣方其討王承宗也既求克獲則兵不可罷乃聽其詭辭止縛從吏凱旋而歸遂使承宗款款朕無所顧憚有志者乃如是乎紀出文忠手又嘗學春秋於胡瓊孫復褒貶稱謹嚴矣而亦有此恕筆何也

穆宗敬宗文宗武宗宣宗
穆宗名桓 憲宗子 敬宗名湛 穆宗子 文宗名浚 穆宗次子 武宗名炎 文宗弟

春秋之法君弑而賊不討則深責其國以為無臣子也憲宗之弑歷三世而賊猶在至於文宗不能明弘志等罪惡以正國之典刑僅能殺之而已是可歎也穆敬昏童失德以其在位不久故天下未至於敗亂而敬宗卒及其身是豈有討賊之志哉文宗恭儉儒雅出於天性嘗讀太宗政要慨朕慕之及即位銳意於治每延英對宰臣率漏下十一刻唐制天子以隻日視朝乃命輟朝放朝皆用雙日凡除吏必召見訪問親察其能否故太和之初政事脩飭

時勢實難且無同心之輔
 穉為清明狀其仁而少斷承父兄之弊宦官撓權制之不得其術
 故其終困以此甘露之事禍及忠良不勝冤憤飲恨而已由是言
 之其能殺弘志亦足伸其志也昔武丁得一傳說為商高宗武宗
 用一李德裕遂成其功狀其奮狀除去浮圖之法甚銳而躬受
 道家之錄服藥以求長年以此見其非明智之不惑者特好惡有
 不同爾宣宗精於聽斷而以察為明無復仁恩之意嗚呼自是而
 後唐衰矣

吳胡函曰文帝大政多有可觀宣宗明察事皆克舉其餘無足
 紀者

憲宗淮蔡之功終始一裴度武宗澤潞之功終始一德裕兩事
 殊可為任相用人之法

懿宗僖宗

唐自穆宗以來八世而為宦官所立者七君狀則唐之衰止豈止
 方鎮之患蓋朝廷天下之本也人君者朝廷之本也始即位者人
 君之本也其本始不正欲以正天下其可得乎懿僖當唐政之始
 衰而以昏庸相繼乾符之際歲大旱蝗民愁盜起其亂遂不可復
 支蓋亦天人之會歟

議論甚正讀之可為於邑

昭宗哀帝

昭帝名傑係宗弟
哀帝名祝昭宗少子

昭宗為人明雋○初亦有志於興復而外患已成在亂內無賢佐○頗亦慨

狀思得非常之材而用匪其人徒以蓋亂自唐之亡也○其遺毒餘

酷更五代五十餘年○至於天下分裂大壞極亂而後止○跡其禍亂

其漸積豈一朝一夕哉

禍深於積漸○議論得之大易○蓋責人以慎○始防微○非委之氣數

已也○言外穆狀可思

禮樂志

唐初即用隋禮。至太宗時，中書令房玄齡、祕書監魏徵與禮官學士等因隋之禮，增以天子上陵、朝廟、養老、大射、講武、讀時令、納皇后、皇太子入學、太常行陵、合朔、陳兵、太社等，為吉禮六十一篇。賓禮四篇，軍禮二十篇，嘉禮四十二篇，凶禮十一篇。是為貞觀禮。高宗又詔太尉長孫無忌、中書令杜正倫、李義府、中書侍郎李友益、黃門侍郎劉祥道、許圜師、太子賓客許敬宗、太常卿韋琨等，增之為一百三十卷。是為顯慶禮。其太繁文雜以式令。而義府、敬宗方得幸，多希旨傳會事，既施行，議者皆以為非。上元三年，詔復用貞觀禮。

禮樂志

禮樂志

十三

禮樂志

由是終高宗世。貞觀顯慶二禮兼行。而有司臨事。遠引古義。與二禮參考。增損之。無復定制。武氏中宗。繼以亂敗。無可言者。博士掌禮。備官而已。玄宗開元十年。以國子司業韋縉為禮義使。以掌五禮。十四年。通事舍人王彙上疏。請刪去禮記舊文。而益以今事。詔付集賢院議。學士張說以為禮記不刊之書。去聖久遠。不可改易。而唐貞觀顯慶禮儀注。前後不同。宜加折衷。以為唐禮。乃詔集賢院學士右散騎常侍徐堅。左拾遺李銳。及太常博士施敬本。撰述。歷年未就。而銳卒。蕭嵩代銳為學士。奏起居舍人王仲丘撰定為一百五十卷。是為大唐開元禮。由是唐之五禮之文始備。而後世

用之。雖時小有損益。不能過也。貞元中。太常禮院修撰王涇。考次歷代郊廟沿革之制。及其工歌祀禘。而圖其壇屋陟降之序。為郊祀錄十卷。元和十一年。秘書郎修撰韋公肅。又錄開元已後禮文損益。為禮閣新儀三十卷。十三年。太常博士王彥威為曲臺新禮三十卷。又採元和以來王公士民昏祭喪葬之禮。為續曲臺禮三十卷。嗚呼。考其文記。可謂備矣。以之施於貞觀開元之間。亦可謂盛矣。而不能至三代之隆者。具其文。而意不在焉。此所謂禮樂為虛名也哉。

沈及菟曰古潔俊雅真大家之文

儀衛志

唐制天子居曰衙○行曰駕○皆有衛有嚴○羽葆華蓋○旌旗罕畢○車馬
 之衆盛矣○皆安徐而不譁○其人君舉動必以扇○出入則撞鐘○庭設
 樂○宮道路有鹵簿○鼓吹○禮官百司○必備物而後動○蓋所以為慎重
 也○故慎重則尊○尊嚴則肅○恭夫儀衛○所以尊君而肅臣○其敬容
 文○采雖非三代之制○至其盛也○有足取焉○
 典○確○不○冗○

天文志

唐興太史李淳風浮圖一行尤稱精博。後世未能過也。故採其要說以著於篇。至於天象變見。所以謹告人君者。皆有司所宜謹記也。

周逸生曰簡遠。

卷之二十五
五行志

五行志

語曰、迅雷風烈必變、蓋君子之畏天也、見物有反常而為變者、失其本性、則思其有以致而為之、戒懼雖微、不敢忽而已、至為災異之學者、不狀莫不指事以為應、及其難合、則引曲取而遷就其說、蓋自漢儒董仲舒劉向與其子歆之後、皆以春秋洪範為學、而失聖人之本意、至其不通也、父子之言自相戾、可勝歎哉、昔者箕子為周武王陳禹所有洪範之書、條其事為九類、別其說為九章、謂之九疇、考其說初不相附屬、而向為五行傳、乃取其五事、皇極庶證、附於五行、以為八事皆屬五行歟、則至於八政、五紀、三德、稽

二十一 史論贊

卷之二十五

五行志

十七

大東堂

疑福極之類。又不能附。至俾洪範之書。失其倫理。有以見所謂苟
引曲取而遷就其說也。朕自漢以來。未有非之者。又其祥青禍病
之說。自其數術之學。故畧存之。庶幾深識博聞之士。有以考而擇
焉。

識議正大膽力卓然。

地理志

考隋唐地理之廣狹。戶口盈耗。與其州縣廢置。其盛衰治亂興亡。
可以見矣。蓋自古為天下者。務廣德而不務廣地。德不足矣。地雖
廣。莫能守也。嗚呼。盛極必衰。雖曰勢使之然。而殆忽驕滿。常因盛
大。可不戒哉。

顧鍾星曰。知要之言。合於經理。

二十一 史論贊

卷二十五 選舉志

十九

選舉志

唐制取士之科多因隋舊。其大要有三。由學館者曰生徒。由州縣者曰鄉貢。皆升於有司而進退之。其科之目有秀才。有明經。有俊士。有進士。有明法。有明字。有明算。有一史。有三史。有開元禮。有道舉。有童子。而明經之別有五。經有三。經有二。經有學究。一經有三禮。有三傳。有史料。此歲舉之常選也。○運、棹、錯、落其天子自詔者曰制舉。所以待非常之才。凡學六皆隸於國子監。國子學生三百人。以文武三品以上子孫。若從二品以上曾孫。及勳官二品。縣公京官四品。帶三品勳封之子為之。太學生五百人。以五品以上子孫。職事

二十一 史論贊

卷二十五 選舉志

十九

十九

官五品暮親若三品曾孫及勲官三品以上有封之子為之四門
學生千三百人其五百人以勲官三品以上無封四品有封及文
武七品以上子為之八百人以庶人之俊異者為之律學生五十
人書學生三十人算學生三十人以八品以下子及庶人之通其
學者為之京都學生八十人大都督中都督府上州各六十人下
都督府中州各五十人下州四十人京縣五十人上縣四十人中
縣中下縣各三十五人下縣二十人國子監生尚書省補祭酒統
烏州縣學生州縣長官補長史主烏凡館二門下省有弘文館生
三十人東宮有崇文館生三十人以皇總麻以上親皇太后皇后

大功以上親宰相及散官一品功臣身食實封者京官職事從三
品中書黃門侍郎之子為之凡博士助教分經授諸生未終經者
無易業凡生限年十四以上十九以下律學十八以上二十五以
下凡禮記春秋左氏傳為大經詩周禮儀禮為中經易尚書春秋
公羊傳穀梁傳為小經通二經者大經小經各一若中經二通三
經者大經中經小經各一通五經者大經皆通餘經各一孝經論
語皆兼通之凡治孝經論語共限一歲尚書公羊傳穀梁傳各一
歲半易詩周禮儀禮各二歲禮記左氏傳各三歲學書日紙一幅
間習時務策讀國語說文字林三蒼爾雅凡書學右經三體限三

歲說文二歲字林一歲凡算學孫子五曹共限一歲九章海島共
 三歲張丘建夏侯陽各一歲周髀五經算共一歲綴術四歲緝古
 三歲記遺三等數皆兼習之旬給假一日前假博士考試讀者千
 言試一帖帖三言講者二千言問大義一條總三條通二為第不
 及者有罰歲終通一年之業口問大義十條通八為上六為中五
 為下併三下與在學九歲律生六歲不堪貢者罷歸諸學生通二
 經俊士通三經已及第而願留者四門學生補太學太學生補國
 子學每歲五月有田假九月有授衣假二百里外給程其不帥教
 及歲中違程滿三十日事故百日緣親病二百日皆罷歸既罷條

其狀下之屬所五品以上子孫送兵部準蔭配色每歲仲冬州縣
 館監舉其成者送之尚書省而舉選不繇館學者謂之鄉貢皆懷
 牒自列於州縣試已標入長吏以鄉飲酒禮會屬僚設賓主陳俎豆備
 管絃牲用少牢歌鹿鳴之詩因與耆艾叙長少焉既至省皆疏名
 列到結款通保及所居始由戶部集閱而關千考功負外郎試之
 凡秀才試方畧策五道以文理通粗為上上上中上下中上凡四
 等為及第凡明經先帖文狀後口試經問大義十條答時務策三
 道亦為四等凡開元禮通大義百條策三道者超資與官義通七
 十策通二者及第散試官能通者依正員凡三傳科左氏傳問大

義五十條。公羊穀梁傳三十條。策皆三道。義通七以上。策通二以上。為第。白身視五經有出身。及前資官視學究一經。凡史科每史問大義百條。策三道。義通七。策通二以上。為第。能通一史者。白身視五經三傳有出身。及前資官視學究一經。三史皆通者。獎擢之。凡童子科十歲以下。能通一經。及孝經論語卷誦文十通者。予官。通七。予出身。凡進士試時務策五道。帖一大經。經策全通。為甲第。策通四。帖過四以上。為乙第。凡明法試律七條。令三條。全通。為甲第。通八。為乙第。凡書學先口試。通乃墨說文字林二十條。通十八。為第。凡算學錄大義本條。為問答。明數造術。詳明術理。狀後為通。

試九章二條。海島孫子五曹。張丘。楚夏。侯陽。周髀。五經算各一條。十通。六記遺三等數帖。讀十得九。為第。試綴術。緝古。錄大義。為問答者。明數造術。詳明術理。無注者。合數造術。不失義理。狀後為通。綴術七條。緝古三條。十通。六記遺三等數帖。讀十得九。為第。落經者。雖通六。不第。凡弘文崇文生試一大經一小經。或二中經。或史記前後漢書三國志各一。或時務策五道。經史皆試。策十道。經通六。史及時務策通三。皆帖。孝經論語共十條。通六。為第。凡貢舉非其人者。廢舉者。校試不以實者。皆有罰。其教人取士著於令者。大略如此。

篇規明整而句法朴雅古奧絕似周禮此文忠得意之作

百官志

唐之官制其名號祿秩雖因時增損而大抵皆沿隋故其官司之
別曰省曰臺曰寺曰監曰衛曰府各統其屬以分職定位其辯貴
賤叙勞能則有品有爵有勳有階以時考覈而升降之所以任羣
材治百事其為法則精而家其施於事則簡而易行所以狀者由
職有常守而位有常負也方唐之盛時其制如此蓋其始未嘗不
欲立制度明紀綱為萬世法而常至於交侵紛亂者由其時君不
能慎守而徇一切之苟且故其事愈繁而官益冗至失其職業而
卒不能復初太宗省内外官定制為七百三十員曰吾以此待天

下賢材足矣。狀是時已有員外置，其後又有特置，同正員。至於檢校兼守判知之類，皆非本制。又有置使之名，或因事而置，事已則罷，或遂置而不廢，其名類繁多，莫能偏舉。自中世已後，盜起兵興，又有軍功之官，遂不勝其濫矣。故采其綱目條理，可為後法及事。雖非正後世，遵用因仍，而不能改者，著於篇。宰相之職，佐天子總百官，治萬事，其任重矣。狀自漢以來，位號不同，而唐世宰相名尤不正。初唐因隋制，以三省之長中書令、侍中、尚書令共議國政，此宰相職也。其後以太宗嘗為尚書令，臣下避不敢居其職，由是僕射為尚書省長官，與侍中、中書令號為宰相。其品位既崇，不欲輕

以授人，故常以它官居宰相職，而假以它名。自太宗時杜淹以吏部尚書參議朝政，魏徵以祕書監參預朝政，其後或曰參議得失，參知政事之類，其名非一，皆宰相職也。貞觀八年，僕射李靖以疾辭位，詔疾小瘳，三兩日一至中書門下平章事，而平章事之名蓋起於此。其後李勣以太子詹事同中書門下三品，謂同侍中、中書令也。而同三品之名，蓋起於此。狀二名不專用，而佗官居職者，猶假佗名如故。自高宗已後，為宰相者必加同中書門下三品，雖品高者亦然。惟三公三師中書令則否。其後改易官名，而張文瓘以東臺侍郎同東西臺三品，同三品入銜，自文瓘始。永淳元年，以黃

門侍郎郭待舉。兵部侍郎岑長倩等。同中書門下平章事。平章事
入御。自待舉等始。自是以後。終唐之世。不能改。初三省長官議事
於門下省之政事堂。其後裴炎自侍中遷中書令。乃徙政事堂於
中書省。開元中。張說為相。又改政事堂。號中書門下。列五房於其
後。一曰吏房。二曰樞機房。三曰兵房。四曰戶房。五曰刑禮房。分曹
以主衆務。為宰相事。無不統。故不以一職名官。自開元以後。常以
領它職。實欲重其事。而反輕宰相之體。故時方用兵。則為節度使。
時崇儒學。則為大學士。時急財用。則為鹽鐵轉運使。又其甚則為
延資庫使。至於國史太清宮之類。其名頗多。皆不足取法。故不著

其詳。學士之職。本以文學言語。被顧問。出入侍從。因得參謀議。納
諫諍。其禮尤寵。而翰林院者。待詔之所也。唐制。乘輿所在。必有文
詞經學之士。下至卜醫伎術之流。皆直於別院。以備宴見。而文書
詔令。則中書舍人掌之。自太宗時。名儒學士。時時召以草制。狀猶
未有名號。乾封以後。始號北門學士。玄宗初。置翰林待詔。以張說
陸堅。張九齡等為之。掌四方表疏。批荅。應和文章。既而又以中書
務劇。文書多壅滯。乃選文學之士。號翰林供奉。與集賢院學士分
掌制詔書敕。開元二十六年。又改翰林供奉為學士。別置學士院。
專掌內命。凡拜免將相。號令征伐。皆用白麻。其後選用益重。而禮

遇益親。至歸為內相。又以為天子私人。凡充其職者無定員。自諸曹尚書下至校書郎皆得與選。入院一歲則遷。知制誥未知制誥者不作文書。班次各以其官內。晏則居宰相之下。一品之上。憲宗時又置學士承旨。唐之學士弘文集賢分隸中書門下省而翰林學士獨無所屬。故附列於此云。
戴石泉曰。志云百官何以獨申宰相學士之制。蓋學士者執政之漸。宰相者百官之領袖也。於此得人自致治安之績。作史者有深意。非徒逞其博辯也。
考按精詳而筆力又足以充之一代大典。炳然在目。

兵志

唐有天下二百餘年。而兵之大勢三變。其始盛時有府兵。府兵後廢而為彊騎。彊騎又廢而方鎮之兵盛矣。及其末也。彊臣悍將。兵布天下。而天子亦自置兵於京師。曰禁軍。其後天子弱。方鎮疆而唐遂以亡。滅者措置之勢使然也。若乃將卒營陣車旗器械。征防守衛。凡兵之事。不可以悉記。記其廢置得失。終始治亂興滅之迹。以為後世戒云。
余岸少曰。合方鎮表觀之。乃見其詳。

食貨志

唐之始時授人以口分世業田而取之以租庸調之法其用之也
 有節蓋其畜兵以府衛之制故兵雖多而無所損設官有常員之
 數故官不濫而易祿雖不及三代之盛時朕亦可以為經常之法
 也及其弊也兵冗官濫為之大蠹自天寶以來大盜屢起方鎮數
 叛兵革之興累世不息而用度之數有能節矣加以驕君昏主姦
 吏邪臣取濟一時屢更其制而經常之法蕩朕盡矣由是財利之
 說興聚歛之臣進蓋口分世業之田壞而為魚并租庸調之法壞
 而為兩稅至於鹽鐵轉運屯田和糴鑄錢括苗權利借商進奉獻

助無所不為矣。益愈煩而愈弊。以至於亡。烏
東語可為言利者。項門一棒。

刑法志

唐之刑書有四。曰律、令、格式、令者尊卑貴賤之等數。國家之制度也。格者百官有司之所常行之事也。式者其所常守之法也。凡邦國之政必從事於此三者。其有所違及人之為惡而入於罪戾者。一斷以律。律之為書。因隋之舊。為十有二篇。一曰名例。二曰衛禁。三曰職制。四曰戶婚。五曰厩庫。六曰擅興。七曰賊盜。八曰鬪訟。九曰詐偽。十曰雜律。十一曰捕亡。十二曰斷獄。其用刑有五。一曰笞。笞之為言耻也。凡過之小者。捶撻以耻之。漢用竹。後世更以楚書。曰扑。作教刑是也。二曰杖。杖者持也。可持以擊也。書曰鞭作官刑。

是也。三曰徒。徒者奴也。蓋奴辱之。周禮曰：其奴男子入於罪隸。任之以事。寘之圜土而教之。量其罪之輕重。有年數而捨。四曰流。書云：流宥五刑。謂不忍刑殺。宥之於遠也。五曰死。乃古大辟之刑也。自隋以前。死刑有五。曰磔。絞。斬。梟。裂。而流徒之刑。鞭。笞。兼用。數皆踰百。至隋始定為笞刑。五自十。至於五十。杖刑。五自六十。至於百。徒刑。五自一年。至於三年。流刑。三自一千里。至於二千里。死刑。二絞。斬。除其鞭刑。及梟首。輻裂之酷。又有議請減贖。當免之法。唐皆因之。
 戴石泉曰：筆。筆。古折。峭。勁。

讀此。迺知刑法至隋而寬。簡。唐因其制。遂稱盛風。何隋書有秋荼朝脛之譏。天下之惡皆歸。歐公特為原之。仁人之心也。

藝文志

六○經○之○道○簡○嚴○易○直○而○天○人○備○故○其○愈○久○而○益○明○其○餘○作○者○衆○矣○
 質○之○聖○人○或○離○或○合○狀○其○精○深○閑○博○各○盡○其○術○而○怪○奇○偉○麗○往○往○
 震○發○於○其○間○此○所○以○使○好○奇○博○愛○者○不○能○忘○也○狀○凋○零○磨○滅○亦○不○
 可○勝○數○豈○其○華○文○少○實○不○足○以○行○遠○歟○而○但○言○俗○說○猥○有○存○者○亦○
 其○有○幸○不○幸○者○歟○今○著○于○篇○有○其○名○而○亡○其○書○者○十○益○五○六○也○可○
 不○惜○哉○

懸國歲山得公之言而交重迺知人以文傳文亦以人傳也表
 章之責其忍辭諸

史記卷一百一十五 宰相表

宰相表

唐因隋舊以三省長官為宰相已而又以他官參議而稱宰相不一出於臨時最後乃有同品平章之名狀其為職則一作宰相表沈雄飛曰一語結得畫狀其詳見於百官志此則存表之目而已無所發明也玩起句甚析

史記卷一百一十五

宰相表

三十一

結撰完密而中間貽宕多致此楊公手筆文忠因之而不廢今人妄為驕矜務欲著作必自己出亦可耻矣

宗室世系表

昔者周有天下封國七十而同姓居五十三焉後世不以為私也蓋所以隆本支崇屏衛雖其弊也以侵凌王室有未大之患朕亦崇獎扶持猶四百餘年而後止蓋其德與力皆不足矣而其勢或朕也至漢鑿秦務廣宗室世其國地不幸世絕若罪除輒復續以存其祭祀與為長久之計故自三代以來獨漢為長世唐有天下三百年子孫蕃衍可謂盛矣其初皆有封爵至其世遠親盡則各隨其人賢愚遂與異姓之臣雜而仕宦至或流落於民間甚可歎也朕其疏戚遠近源流所來可以考見作宗室世系表

宗室世系表

宗室世系表

宗室世系表

三十三

大宋堂

揚誠齋先生稱李唐宗子人才之盛。超軼前後代。余初不之信。及以景公所書之傳讀之。如李勉之鯁亮。劉介李石之當軸。不橈。此其忠義之過人也。如李賀之七歲能辭章。李白之十歲通詩書。此其秀穎之過人也。元亮之陳疏而多所裨正。李漢之言切而多所救補。道暉之清白著稱。景俊之輕財篤義。此其節槩之過人也。都督河南而政不苟細。有如適之。檢校雍州而發摘姦伏。有如崇義。更都督而所在稱治。有如李湊。治江州而美政見褒。有如李澶。其能於官者若此。閨門修整。有如元加。振恤甥婚。有如李獻。有父喪而親喪不復識者。有如適彥。居母喪而家人不見言笑者。有如伯高。其孝於家者若此。以至李禕之掘地千里。孝之令。楊南海。李皋之單騎造壘。宗道之百騎入賊。與夫復平蠻。落如夷。簡轉勞諸軍。如李誼。飛矢著身而益勵。流血汚袂。而不告。拘留於突厥。頡利而不屈。如李湊。李澶之徒。是又以身當國。竭忠盡瘁者。又何如。景公推許若此。今合唐書所載。表論觀之。良不誣云。

宗室世系表 三十一

宰相世系表

唐為國久傳世多而諸臣亦各修其家法務以門族相高其材子
 賢孫不殞其世德或父子相繼居相位俱是勉勵之詞或累數世而屢顯或終唐
 之世不絕嗚呼其亦盛矣朕其所以盛衰者雖由功德薄厚亦在
 其子孫作宰相世系表
 沈豈虬曰其文約以達使劉知幾見之當必采入史通

二十一史論贊 唐書

宋 歐陽修 誤 明 沈國元 閱

列傳

后妃

唐制皇后而下有貴妃、淑妃、德妃、賢妃，是為夫人；昭儀、昭容、昭媛、脩儀、脩容、脩媛、充儀、充容、充媛，是為九嬪；婕妤、美、人才人，各九合二十七，是代世婦；寶林、御女、采女，各二十七，合八十一，是代御妻。自餘六尚、分典乘輿服御，皆有負次。後世改復不常。開元時，以后下復有四妃，非是，乃置惠、麗、華三妃，六儀、四美人，七十人，而尚宮

尚儀尚服各二。參合前籍。大抵踵周官相損益云。朕則尚矣。禮本
夫婦詩。始。后妃治亂。因之興止。係焉。盛德之君。惟薄嚴與。裏謁不
忤。於朝外言。不內。諸閭。睚之風行。彤史之化。脩故淑。範懿行。更
為內助。若夫豔嬖之興。常在中主。第凋既交。則情與愛。遷顏辭媚。
藜則事為私奪。乘易昏之明。牽不斷之柔。險言似忠。故受而不詰。
醜行已效。反徂而為好。左右附之。檢至甚之。狡謀鉗其悟。先哀誓
捷於寵初。天下之事。已去而恬不自覺。此武韋所以遂篡弒而喪
王室也。至於楊氏未死。玄亂厥謀。張后制中。肅幾斂衽。吁可嘆哉。
中葉以降。時多故矣。外有攻討之勤。內寡懋溺之私。羣閹朋進。外

威勢分。后妃無大善惡。取充職位而已。故列著于篇。
痛詆之言。又何風艷也。

后妃列傳

或稱武韋亂唐同一轍武持久韋亟滅何哉議者謂否武后自高
 宗時挾天子威福脅制四海雖逐嗣帝改國號朕賞罰已出不假
 借羣臣僭於上而治於下故能終天年貼亂而不亡韋氏乘夫淫
 蒸於朝斜封四出政教不一既燬殺帝引睿宗輔政權去手不自
 知威地已疎人心相挺玄宗籍其事以憾豪英故取若撥遺不旋
 踵宗族夷丹執奪而事淺也朕二后遺後王戒顧不厚哉
 朱幼柱曰精於義例故盡而不激繳語意主懲勸深合左氏後
 經終義之法

宗室

景元子孫當草昧之初乘運而奮方高祖攘除四方所以宣力皆
顯顯為世豪英至河間之功江夏之畧可謂宗室標的者也始唐
興疏屬畢王至太宗稍稍降封時天下已定帝與名臣蕭瑀等喟
朕講封建事欲與三代比隆而魏徵李百藥皆謂不朕徵意以唐
承大亂民人彫喪始復生業遽起而瓜分之故有五不可之說百
藥稱帝王自有命曆祚之短長不緣封建又舉春秋二百四十二
年之禍亟於哀平桓靈而詆曹无首陸士衡之言以為繆悠而顏
師古獨議建諸侯當少其力與州縣襟治以相維持朕天子由是

罷不復議。至名儒劉秩。目武氏之禍。則建論以為設爵無土。署官不職。非古之道。故權移外家。宗廟絕而更存之。之理在取順而難逆。絕之之原在單弱而無所憚。至謂郡縣可以小寧。不可以久安。大抵與曹陸相上下。而杜佑。柳宗元。深探其本。據古驗今。而反復焉。佑之言曰。夫為人置君。欲其蕃息。則在郡縣。狀而主祚常促。為君置人。不病其意。則在建國。狀而主祚常永。故曰建國利一宗。列郡利百姓。且立法未有不敬者。聖人在度其患之長短而為之。建國之制。初若磐石。狀敬則鼎峙。力爭陵遲。而後已。故為患也長。則郡之制。始天下一軌。敬則世崩俱潰。狀而戡定者。易為功。故其為患也短。又謂三王以來。未見郡縣之利。非不為也。後世諸儒。因泥古疆為之說。非也。宗元曰。封建非聖人意。狀而歷堯舜三王。莫能去之。非不欲去之。勢不可也。秦破六國。列都會。置守宰。據天下之圖。攝制四海。此其得也。二世而亡。有由矣。暴威刑竭。人力天下相合。劫令殺守。圜視而竝起。時則有叛民。無叛吏。漢矯秦枉。剖海內。立宗子。功臣數十年間。奔命扶傷。不給。時則有叛國。無叛郡。唐興。制州縣。而築點。時起。失不在州。而在於兵。時則有叛將。無叛州。以為矯而革之。垂二百年。不在諸侯。明矣。又言湯之興。諸侯歸者三千。資以勝。夏武王之興。會者八百。資以滅。商狗之為安。故仍以

為俗是湯武之不得已也。不得已非公之大也。私其力於己也。秦
車之者其為制公之大者也。其情私也。朕而公天下之端自秦始
云。觀諸儒之言誠朕。朕建侯置守如質文遷救亦不可一槩責也。
救土崩之難莫如建諸侯。削尾大之勢莫如置守宰。唐有鎮帥古
諸侯也。故王者視所救為之勿及於散。則善矣。若乃百藥推天
命。佑言郡縣利百姓而主祚。促乃臆論也。不磨之論可息。聚訟
劉泰鴻曰。視所救為之勿及於散。千古不磨之論。可息聚訟。
叙有倫次。議有關裨。父之規。局歸朕崇峙。

三宗諸子

中宗失道。身為母所廢。妻所弑。而四子皆不得其死。嗣亦不傳。殆
天穢其德而絕之。何耶。彼固自絕於天。云爾。睿宗有聖子。一受命
一退帝。三贈太子。天與之報。福流無窮。盛歎。
周五溪曰。睿穢之報如此。人主安可不謹身修德。而點天字。如
雙眸湛水。

十一宗諸子
十一宗諸子
十一宗諸子
十一宗諸子

十一宗諸子

唐自中葉宗室子孫多在京師。幼者或不出閭。雖以國王之寶與
匹夫不異。故無赫赫過惡。亦不能為王室。軒輕運極不還。與唐俱
殫。狀則曆數短長自有底止。彼漢七國。晉八王。不得其效。愈速禍
云。

姚仙期曰。歸之曆數是遠觀。是平論。

十一宗諸子
十一宗諸子
十一宗諸子
十一宗諸子

二十一 史論

卷二十六

諸公主

大來堂

諸公主

婦人內夫家雖天姬之貴史官猶外而不詳又僖昭之亂典策埃滅故諸帝公主降日堯年粗得其際良史職止者闕而不書獨昭大義

二十一 史論

卷二十六 諸公主

大來堂

李密

或稱密似項羽。非也。羽與五年霸天下。密連兵數千百戰不能取東都。始玄感亂。家首勸取關中。及自立。亦不能鼓而西。豈其亡也。狀禮賢得士。乃田橫徒歎賢陳涉遠矣。意使密不為叛。其才雄亦不可容於時云。如此方令密心死。隋書猶屬膚揣。

王世充實建德

煬帝失德天醜其為生人顛辜羣盜乘之如蝟毛而奮其劇者若
李密因黎陽蕭銑始江陵實建德連河北王世充舉東都皆磨
搖毒以相噬螫其間亦假仁義禮賢才因之擅王僭帝所謂盜亦
有道者本夫孽氣腥焰所以亡隋弱唐明德折北不支禍極凶殛
乃就穢夷室哉

太陽燭火之喻古人良不虛也

劉文靜裴寂

應龍之翔。雲霧滃。狀而從。震風薄。怒萬空。不約而歸。物有自狀。相
 動耳。觀二子。非有蹕越之姿。當高祖受命。赫狀利見於世。故能或
 翼。或從尸天之功。云文靜數履軍陣。以才自進。而寂專用事。昵
 顯外者。易乘通者。難疏。故文靜先被蹕望。誅寂後坐。誤言斥誠。異
 夫蕭何曹參矣。

沈鶴山曰。判別罪狀。使人帖首。

屈突通。尉遲敬德。張公謹。秦瓊。唐儉。段志雲。
也。敬德之來。太宗以赤心付之。棄蔭不徙。而大功立。君臣相遇。古
人謂之千載。顧不諒哉。投機之會。間不容繸。公謹所以抵龜而決
也。

薛仲翊曰快論快筆。

二十一史論詩

卷二十六

劉弘基

劉弘基殷開山劉政會許紹程知節柴紹任璋丘和
帝王之將興其威靈氣燭有以動物悟人者故士有一槩皆填狀
躍而附之若椽椽梁柱以成大室又負偃植各安所施而無遺材
諸將之謂邪朕皆能禮法自完賢矣哉

好摹寫言外見得正宗處置之妙有以善其始而持其終

二十一史論詩

卷二十六

劉弘基

十三

李靖李勣

唐興其名将曰英衛擢皆罪亡之餘遂能依乘風雲勦功帝籍蓋
君臣之際固有以感之獨推期運非也若靖闔門稱疾畏遠權逼
功大而主不疑雖古哲人何以尚茲勣之節見于黎陽故太宗勤
勤於託孤誠有為也至以老臣輔少主會房帷易奪天子畏大臣
依違不專委誠取決惟議是聽勣乃私已畏禍從而薰之武氏奮
而唐之宗屬幾殲焉及其孫因民不恐舉兵覆宗至掘冢而暴其
骨嗚呼不幾一言而喪邦乎惜其不通學術昧夫臨大節不可奪
之諫反與許李同科可不戒哉世言靖精風角鳥占雲祲孤虛之

術為善用兵是不朕特以臨機果料數明根於忠智而已俗人傳
著怪詭機祥皆不足信故列請所設施如此
王順渠曰小人受恩如泰山可背而背之矣至於一言之怨則
銜之入骨沒身不忘也太宗之出李世勣也告太子曰徘徊顧
望當殺之耳此言世勣必聞之矣故受詔不至家中去銜此一
言深入骨髓平生君臣契分皆亡之矣武氏之立世勣豈不知
其不可朕所以懲懲以成之者正所以報太宗疇昔一言之恨
也嗚呼小人之忍如此可畏也哉可畏也哉
大臣之識正人之言

侯君集張亮薛萬均盛彥師盧祖尚劉世讓李君羨

侯君集位將相私謁太子張亮養子五百人薛萬徹與狂豎謀皆
死有餘責又何咎哉以太宗之明德殺於讒讖濫君羨之誅徒使
孽后引以自裨顧不衰哉
錯落搖宕若煙綃風帶

古者受姓受氏以旌有功是時人皆土著故名宗望姓舉郡國自表而譜系興焉所以推叙昭穆使百代不得相亂也遭晉播遷胡醜亂華百宗蕩析士去墳墓子孫猶挾系錄以示所承而伐閹顯者至賣昏求財汨喪廉耻唐初流弊仍甚天子屢抑不為哀止中葉風教又薄譜錄都廢公靡常產之物士亡舊德之傳言李恣出龐西言劉恣出彭城悠悠世昨訖無考按冠冕卑隸混為一區可太息哉

高儉
古者受姓受氏以旌有功是時人皆土著故名宗望姓舉郡國自表而譜系興焉所以推叙昭穆使百代不得相亂也遭晉播遷胡醜亂華百宗蕩析士去墳墓子孫猶挾系錄以示所承而伐閹顯者至賣昏求財汨喪廉耻唐初流弊仍甚天子屢抑不為哀止中葉風教又薄譜錄都廢公靡常產之物士亡舊德之傳言李恣出龐西言劉恣出彭城悠悠世昨訖無考按冠冕卑隸混為一區可太息哉
居必正曰陋風相扇後來彌甚公為此言其所磨厲者遠矣

卷二十六 高儉實威

高儉實威
高儉雖緣外戚姻家。狀自以才猷結天子。厠跡名臣。垂榮無窮時。有遇合。故見諸事業。古來賢豪。不遭興運。埋光鏟采。與草木俱腐。者可勝咤哉。實宗自魏訖唐。支胄扶疏。數百年所。馮厚矣。論人論事。必歸根本。故卓狀可垂。

高儉實威

高儉雖緣外戚姻家。狀自以才猷結天子。厠跡名臣。垂榮無窮時。有遇合。故見諸事業。古來賢豪。不遭興運。埋光鏟采。與草木俱腐。者可勝咤哉。實宗自魏訖唐。支胄扶疏。數百年所。馮厚矣。論人論事。必歸根本。故卓狀可垂。

卷二十六 高儉實威 十七

卷之六
房玄齡
十八

房玄齡杜如晦

唐柳芳有言帝定禍亂而房杜不言功王魏善諫而房杜讓其直
英衛善兵而房杜濟以文持衆美效之君是後新進更用事玄齡
身處要地不吝權善始以終此其成令名者諒其狀乎如晦雖任
事日淺觀玄齡許與及帝所親款則謨謀果有大過人者方居臣
明良志叶議從相資以成固千載之遇蕭曹之勛不足進焉雖狀
宰相所以代天者也輔贊彌縫而藏諸用使斯人由而不知非明
哲曷臻是哉彼揚已取名瞭狀使戶曉者蓋房杜之細邪
張挹婁曰代天名論宜書一通於政事堂之左

二十一
史論
卷二十六
房玄齡
十八

君○臣○之○際○顧○不○難○哉○以○徵○之○忠○而○太○宗○之○睿○身○歿○未○幾○猜○譖○遽○行○
始○徵○之○諫○累○數○十○餘○萬○言○至○君○子○小○人○未○嘗○不○反○復○為○帝○言○之○以○
佞○邪○之○亂○忠○也○飄○宕○久○猶○不○免○故○曰○皓○皓○者○易○汙○峽○峽○者○難○全○自○古○所○
歎○云○唐○柳○芳○稱○徵○死○知○不○知○莫○不○恨○惜○以○為○三○代○遺○直○諒○哉○
論議挺挺有祖風烈詩所謂是以似之者歟
短篇難於曲折灑宕讀此迺知公之所長政在是

馬周

周之遇太宗。顧不異哉。由一介草茅。言天下事。若素宦於朝。明習憲章者。非王佐才。疇以及茲。其自視與築巖釣渭。亦何以異迹夫。
所謂游之。揣摩。
帝銳於立事。而周所建皆切一時。以明佐聖。故君宰間不膠漆而固。恨相得晚。空矣。狀周才不逮。傳說呂望。使後世未有述焉。惜乎。
褒貶在言內。又若在言外。史之所謂微辭。

言表
卷二十六
二十一

薛收

王○者○用○人○非○難○。○盡○其○才○之○為○難○。○觀○太○宗○之○責○任○也○。○謀○斯○從○言○斯○聽○。○
才○斯○奮○洞○狀○不○疑○。○故○人○臣○未○始○遺○力○。○天○子○高○拱○操○成○功○。○致○太○平○矣○。○
始○皆○奮○止○命○布○衣○。○嬪○狀○列○置○上○袞○。○薛○收○雖○蚤○天○帝○本○以○中○書○令○待○
之○。○御○臣○之○方○顧○不○善○哉○。○挺○晚○節○流○落○。○蓋○有○致○而○狀○。○
直○言○太○宗○善○用○人○。○無○一○語○及○收○之○才○。○而○收○之○才○愈○見○。○夫○中○書○令○
唐○之○宰○相○也○。○才○堪○作○相○。○則○收○有○大○過○人○者○矣○。○正○題○反○做○。○久○章○妙○
訣○也○。

二十一
薛收
二十一

劉洎

劉洎之才之烈。易所謂王臣蹇蹇者。狀性剛疏。輔太子。欲身任安。危以言掩其衆。為媚忌所乘。卒陷罪誅。嗚呼。以太宗之明。蔽於所。念洎之忠。不能自申於上。況其下哉。古人以言為戒。可不慎歟。此為君恤其明。非為臣憐其忠也。使人盡以言為戒。則國家無。有効忠者矣。讀史者。要當於此際。想見古人立言之意。

二十一 史論 賈

卷二十六 劉洎

二十二

大來堂

封倫裴矩宇文士及

封倫裴矩其姦足以止隋其知反以佐唐何哉惟姦人多才能與
時而成敗也妖禽孽狐當晝則伏自如得夜乃為之祥若倫偽行
匿情死乃暴聞免兩觀之誅幸矣太宗知士及之佞為游言自解
亦不能斥彼中材之主不惑於佞難哉
程際甫曰禽狐之喻嚴於兩觀

二一 史論

卷二十六 封倫

二十三

大來堂

二十一 史論贊
卷二十六 蕭悅
二十四

蕭悅

悅議銷兵。寧不野哉。當此時。河朔雖挈地還天子。而悍卒頑夫。開口仰食者。故在。彼皆不能自返於本業者也。又朱克融等客長安。餓且死。不得一官。而悅未有以措置。便欲去兵。使羣臣失職。一日。叫呼其從。如市。幽魏相挺。復為賊淵。可謂見豪末而不察與薪矣。宰相非其人。禍可既乎。

不明於時勢者。不可以論事。公仰觀往迹。若在指掌。只是識慮。深遠耳。以此作宰相。可殺靖康之禍。是以考世君子。嘗有隱恨焉。

二十一 史論贊

卷二十六 蕭悅

二十四

大宋堂

蕭瑀

梁蕭氏興江左實有功在民厥終無大惡以寢微而止故餘社及其後裔自瑀逮邁凡八葉宰相名德相望與唐盛衰世家之盛古未有也

趙君晦曰可為蕭氏實錄

姚思廉

隋煬帝失德。高祖總豪英。興北方。鼓行入關。舉京師。轟若震霆。思廉以諸生侍。辱主奮狀。陳大義。挫虓虎。而奪之氣。勇夫悍心。褫駭自卻。不敢加無禮於其君。誠使有國家者。舉不失義。天下其何以抗之哉。宣太宗之尊表云。

李大雅曰。語語英挺。有紫電薄之。

二十一 史記卷

卷二十六 姚思廉

二十六

史記卷

二十一 史記卷

卷二十六

史記卷

文○本○才○猷○世○南○鯁○諤○百○藥○之○持○論○亮○思○廉○之○遠○雅○德○芬○之○辭○章○皆○
治○世○華○采○而○泐○汨○於○隋○光○明○於○唐○何○哉○蓋○天○下○未○嘗○無○賢○以○不○用○
止○不○必○多○賢○以○見○用○興○夫○典○章○圖○史○有○國○者○尤○急○所○以○考○存○亡○成○
敗○陳○諸○前○而○為○之○戒○方○天○下○初○定○德○芬○首○發○其○議○而○後○唐○之○文○物○
粲○狀○誠○知○治○之○本○與○
端○雅○警○密○用○賢○右○文○尤○為○偉○議○

岑文本虞世南李百藥褚亮姚思廉令狐德芬

蘇世長韋雲超孫伏伽張玄素

始○唐○有○天○下○懲○刈○隋○敝○數○內○謹○言○而○世○長○等○侃○然○獻○忠○時○主○方○褒○
聽○籍○以○勸○天○下○雖○觸○禁○忌○而○無○忤○猜○及○禍○亂○已○平○君○位○尊○安○後○者○
視○前○人○之○為○猶○以○鯁○論○期○榮○故○時○時○遭○斥○讓○為○所○厭○苦○非○言○有○巧○
拙○所○遭○之○時○異○也○夫○性○有○不○可○移○雖○堯○舜○弗○能○訓○承○乾○之○惡○根○著○
於○心○而○歸○責○玄○素○其○何○救○哉○此○士○壘○辭○不○能○傳○太○子○諒○矣○
人○主○喜○憎○茹○吐○之○故○明○列○如○畫○時○之○為○義○大○矣○哉○有○言○責○者○不○
可○不○知○

于志寧高准張行成

于志寧諫太子承乾幾遭賊殺。狀未嘗懼。知太宗之明。雖匕首堪胸。不愧也。及武后立。不敢出一言。知高宗之昧。雖死無益也。季輔行成數進諫。狀雍容有禮。皆長厚君子哉。
李爾昌曰。有其心。又有其術。故全也。

但見犯顏敢諫之為忠。殺身成仁之名義。尊守名教之為賢。不知適以增武氏之虐焰。而引之滔天。蓋至於易姓受命。改唐為周。朕後知其罪不在李勣。許敬宗而在。褚遂良。長孫無忌。諸人矣。彼其敢於肆毒。興羅織。誅殺宗室大臣者。不過欲以箝天下之口。而使之不敢違異也。使其時畫如陳平。絳侯。畧無違異之嫌。則武氏固聰明主也。非呂氏比也。必有所以自處者矣。卓吾此論。不為無見。但名教高于青備。李勣一言喪邦之罪。烏能辭云。

傳奕呂才陳子昂王無競

子昂說武后興明堂太學。其言甚高。殊可怪矣。竊威柄。誅大臣宗室。脅逼長君。而奪之權。子昂乃以王者之術勉之。卒為婦人訕侮。不用。可謂薦圭璧於房闈。以脂澤汗漫之也。替者不見泰山。聾者不聞雷霆。子昂之於言。其聾聵歟。

明堂祖宗配饗之地。太學倫紀自出之原。子昂或借是以動女主之良心。其立言別有機權。未可以不用。而抹殺其苦衷耳。

[Faint bleed-through text from the reverse side of the page]

劉仁軌裴行儉婁師德

仁○軌○等○以○兵○開○定○四○夷○其○勇○無○前○至○奉○上○則○瞿○瞿○若○不○及○行○儉○臨○
下○以○恕○師○德○寬○厚○其○能○以○功○名○始○終○者○蓋○近○乎○勇○於○敢○則○殺○勇○於○
不○敢○則○活○者○邪○
用○句○如○用○兵○有○置○之○亡○地○而○後○存○之○妙○

諸夷蕃將

夷狄性悖固其能知義所在者。勢挺不可遷。蓋巧不足而惡常有。餘觀大柰等事。君皆一其志。無有顧望。用能功績光明。為天子倚信。至渾瑊跌跌光顏輩。與兵無窮。惟其諒有餘故也。瑊光顏自有傳。今類其人著之篇。無有顧望。夏人難之。大為蕃將生色。

郭孝恪王方翼程務王孝傑唐璿張仁愿王峻

唐所以能威振夷荒。斥大封域者。亦有虎臣為之牙距也。至師行
數千萬里。窮討殊鬪。獵取其國。由麻豕狀。可謂選值其才歟。夫宰
相代天秩物。燮化人神。惟有德者。宜之。若生璟。仁愿用以丞弼。非
疆所不能邪。据功名之地。則綽綽矣。
馮又嘗曰。妙有餘地。

狄仁傑郝處俊朱敬則

武后乘唐中衰，操殺生柄，劫制天下，而攘神器。仁傑蒙耻奮忠，以權大謀，引張柬之等卒復唐室，功蓋一時。人不及知，故唐呂溫頌之曰：取日虞淵，洗光咸池，潛授五龍，夾之以飛。世以為名言，方高宗舉天下將以禪后，處俊固爭，不使妻乘夫陰，反陽至，姦人銜怨，仇皆以逞。蓋所謂諠形於主，耶敬則一諫而羅織之，微哀時而後言者歟。

熊太室曰：如此人，如此文，方可與日月爭光。難必共濟，始有其功。武氏司晨，舉朝皆其腹心，而狄仁傑以一

身○徇○唐○非○孤○立○於○睽○離○之○世○乎○乃○下○薦○洛○州○司○馬○張○東○之○薦○一○東○之○而○五○東○之○合○與○仁○傑○而○六○周○復○為○唐○仁○傑○之○志○行○矣○

裴炎劉禕之魏玄同李昭德吉頊

異○乎○炎○之○暗○於○幾○也○知○中○宗○之○不○君○不○知○武○后○之○盜○朝○假○虎○翼○而○責○其○搏○人○死○固○空○哉○昭○德○頊○進○不○以○道○君○子○耻○之○雖○朕○一○情○區○區○抑○武○興○唐○其○助○有○端○則○賢○炎○達○矣○禕○之○玄○同○漏○言○及○誅○不○失○所○以○事○君○者○云○
起○得○突○兀○中○復○曲○折○收○極○滄○遠○文○勢○文○情○亦○云○備○矣○

韋見素

楊國忠本與安祿山爭寵。故捕吉溫以激其亂。陰儲蜀貨待天子
之出。則已與韋見素流涕爭祿山反狀。將信所言。以久其權。見素
能言祿山反。不能言所以反。是佐國忠敗王室也。玄宗不悟。仍相
之。卒為後帝所薄。狀猶完其要領。幸矣。謂見素為前知。果非也。
梁飲光曰。韋挺無前筆力。橫絕。擡發幽微。不減焮犀之燭。

張廷珪韋縠韓思復辛替否
 夫以下摩上士所甚患狀取名寢多故上失德則與下爭名而後
 有誅夷斥竄事狀或依古肆言高而難從以邀主賈直者逆之似
 傷道行之不切時此言事常弊也若廷珪數子優游彌縫皆中時
 病非所謂賈直自榮者也至渤爭晏朝潁諫方士甘斥鄭注不可
 作宰相排寵救危不得不爾賢哉
 無數層折而無略略難了之處大文所以彌樸也

[Faint bleed-through text from the reverse side of the page]

徐有功

徐有功不以唐周貳其心。惟一於法。身蹈死以救人之死。故能處
猜后酷吏之間。以怒自將。內挫虐焰。不使天下殘於燎。可謂仁人
也。哉。議者謂過漢于張。詎不信夫。
張爾公曰奇崛。

白居易

居易在元和長慶時與元稹俱有名。最長於詩。它文未能稱是也。多至數千篇。唐以來所未有。其自叙言關美刺者謂之諷諭。詠性情者謂之閑適。觸事而發謂之感傷。其它為雜律。又譏世人所愛。惟雜律詩彼所重。我所輕。至諷諭意激而言質。閑適思澹而辭迂。以質合迂。空人之不愛也。今視其文。信狀而杜牧謂纖豔不逞。非莊士雅人所為。流傳人間。子父女母交口教授。淫言媒語。入人肌膚。不可去。蓋救所失。不得不云。觀居易始以直道奮在天子前。爭安危。冀以立功。雖中被斥。晚益不衰。當宗閔時。權勢震赫。終不附。

離○為○進○取○計○完○節○自○高○而○積○中○道○微○險○得○宰○相○名○望○淮○朕○嗚○呼○居○
易○其○賢○哉○
又○多○引○述○時○出○斷○裁○井○井○朕○吃○吃○朕○良○史○構○也○

五王

五王提衛兵。誅嬖臣。中興唐室。不淹辰。天下晏朕。其謀深矣。至謂
中宗為英王。不盡誅諸武。使天子籍胡說以為威。何其淺耶。豐牙一啓。
為豔后。暨兒所乘。劫持殘辱。若放豚。朕何哉。無亦神奪其明。厚韋
氏毒以興。先天之業。乎不朕安。李之功。賢於漢平。勃遠矣。
張柬之等。雖機昧先圖。厥功難掩。薛季昶之言。不在耳乎。若非
神奪詎至是哉。觀史至此。浩嘆竟夕。

二十一 史記 卷二十六 大牙堂

劉幽求鍾紹京在日用王琚王毛仲

幽○求○之○謀○紹○京○之○果○日○用○之○智○琚○之○辯○皆○足○濟○危○紓○難○方○多○故○時○
必○資○以○成○功○者○也○雄○邁○之○才○不○用○其○奇○則○啟○朕○不○滿○誠○不○可○與○共○
治○平○哉○有識姚○崇○勸○不○用○功○臣○宣○矣○朕○待○幽○求○等○恨○太○薄○云○毛○仲○小○人○
志○得○而○驕○不○足○論○已○

趙○子○酉○曰○處○此○者○極○難○必○如○師○之○上○六○謙○之○九○三○而○後○君○臣○之○
義○交○盡○過○厚○偏○薄○皆○非○得○中○

魏元忠韋安后郭震

魏韋皆感察而奮似矣。及在昏上側臣間。臨機會不一引手。堪姦邪之謀。誠可鄙哉。至夔后豔主。以烝譖撼宗社。亦不肯從也。古所謂具臣者。諒乎元振功顯節完。一跌未復。世恨其蚤歿云。孔君美曰。浩浩落落。有疎越之致。

李嶠蕭至忠盧茂用韋巨源趙彥昭和逢堯

異哉玄宗之器蕭至忠也。不亦惑乎。至忠本非賢而寄賢以奸利。失之則邀利以喪賢。姁艷后扶寵主。取宰相謀間王室。身誅家破。遺臭無窮。而帝以乾曜似之。遽使當國。是帝舉不知。至忠之不可用。又不知。乾曜之所可用也。或稱帝不以罪淹才。益可恠嘆。嗚呼。力士誠腐奄夫庸人。不能發擢天子之迷。若曰。至忠賢於初。固不繆於末。既繆於末。果不賢於初。惟陛下圖之。如是。帝且悟。往失而精來鑿已。其後相李林甫。將安祿山。皆基於不明。身播岷隩。信自取之歟。

此段美曰... 亦惑乎... 至忠本非賢... 寄賢以奸利... 失之則邀利... 喪賢... 遺臭無窮... 帝以乾曜似之... 遽使當國... 是帝舉不知... 至忠之不可用... 又不知... 乾曜之所可用也... 或稱帝不以罪淹才... 益可恠嘆... 嗚呼... 力士誠腐奄夫庸人... 不能發擢天子之迷... 若曰... 至忠賢於初... 固不繆於末... 既繆於末... 果不賢於初... 惟陛下圖之... 如是... 帝且悟... 往失而精來鑿已... 其後相李林甫... 將安祿山... 皆基於不明... 身播岷隩... 信自取之歟。

熊渭陽曰反復折辯情致淋漓可誦

姚崇宋璟

姚崇以十事要說天子而後輔政顧不偉哉而舊史不傳觀開元
初皆已施行信不誣已宋璟劉正又過於崇玄宗素所尊憚常屈
意聽納故唐史臣稱崇善應變以成天下之務璟善守文以持天
下之正二人道不同同歸於治此天所以佐唐使中興也嗚呼崇
勸天子不求邊功璟不肯賞邊臣而天寶之亂卒蹈其害可謂先
見矣○狀唐三百年輔弼者不為少獨前稱房杜後稱姚宋何哉君
臣之遇合蓋難矣夫

錢疑庵曰張說減用退而姚宋相珣俞執誼退而黃裳相唐之

興也。勃烏棟隆吉之效明矣。相品相才相識相業。姚宋可謂兼之矣。以匹房杜奚忝哉。

蘇環張說

說於玄宗家有德及太平用事納忠惓惓又圖封禪發明典章開元文物彬彬說力居多中為姦人排擯幾不免自古功名始終亦幾希何獨說哉至於以利遽敗其家若環頗再世稱賢宰相盛矣。劉鳴腫曰：渾雅平直有陳魏遺風。只以一語找出環顛其勝說處多在言外。局法變極。

魏知古張九齡

人之立事無不銳始而工於初。至其半則稍怠。平而漫漶不振也。觀玄宗開元時。屬精求治。元老魁舊。動所尊憚。故姚元崇宋璟言。聽計行力不難。而功已成。及太平。以左右大臣。皆帝自識。擢狎而易之。志滿意驕。而張九齡爭愈切。言益不聽。夫志滿則忽其所謀。意驕則樂軟。諛憎鯁。切較力雖多。課所效不及。姚宋遠矣。終之胡。雖亂華身播邊陲。非曰天運。亦人事有致。而朕若知古等皆宰相。選使當天寶時。庸能有救哉。朱觀以曰。傳神寫照。在箇中。亦在象外。

鄧主亭讀蘇子志林論唐明皇不殺安祿山為盛德事恤其失
言及譏九齡執法不如魏絳之戮楊干釀成唐室亂亡之禍知
言哉方張守珪上祿山於朝以其失律喪師也夫喪師失律國
有常刑時九齡為相佐天子以請四海當據法行辟不必以反
相預料之也是滋人主之疑也其心必曰汝疑其反吾恤其才
反形未露而輕於棄才吾不為也嗚呼此九齡所以雖有忠言
卒不能回明皇之心也夫人臣之職莫大於執法法之不執風
度安在雖有千秋金鑑懇懇效忠亦何益哉由是推之大臣處
天下事有識不可無斷也琦記

崔隱甫

嚴挺之拒宰相不肯見李林甫崔隱甫違詔不屈牛仙客信劄者
乎二人坐是皆不得相彼亦各申其志也管夷吾以編棧論之信
曲與直不相函哉

峻節介操如蒼松翠柏歷四時而不改其色

張嘉貞源乾曜

開元之盛。所置輔佐。皆得賢才。不者若張源等。猶惓惓事職。其建
 明。有足稱道。朝多君子。信太平基。歟。張氏三世宰相。狀器有所窮。
 嘉貞窮於俗。延賞窮於枝。弘靖窮於權。惜哉。
 李右皇曰。義正而語趣。

宗室宰相

周之卿士周呂毛原皆同姓國也。唐宰相以宗室進者九人。林甫
 姦諛。幾亡天下。李程和柔在位。無所發明。其餘以材稱職。蹄賢宰
 相。秦隋棄親侮賢。皆二世而滅。周唐任人不疑。得親親用賢之道。
 饗國長久。嗚呼盛歟。
 親親用賢。治道之大。特有世輕世重耳。千古自不可廢。唐德敦
 信。比隆於周。當非溢筆。

劉知幾吳兢韋述蔣乂柳芳沈既濟傅師

唐興史官秉筆衆矣。狀垂三百年業。鉅事叢簡策。罕繁其間。巨盜
 再興。圖典焚逆。大中以後。史錄不存。雖論著之人。隨世褒掇。而疏
 舛殘餘。本末顛倒。故聖主賢臣。叛人佞子。善惡汨汨。有所未盡。可
 為永愾者矣。又舊史之文。猥釀不綱。淺則入俚。簡則及漏。寧當時
 儒者有所諱。而不得騁耶。或因淺仍俗。不足於文也。亦有待於後
 取當而行遠耶。何知幾以來。工訶古人。而拙於用已。歟。自韓愈為
 順宗實錄。議者闕狀不息。卒竄定無完篇。乃知為史者亦難言之
 游夏不能措辭於春秋。果可信也。

作史之難如此○彼未晰乎三長五難三等四患之說者○安可濫
廁芸香之署○縷述諸疵○形容曲盡○堪繁狀而噉

*作史之難如此○彼未晰乎三長五難三等四患之說者○安可濫
廁芸香之署○縷述諸疵○形容曲盡○堪繁狀而噉*

王忠嗣

以○忠○嗣○之○才○戰○必○破○攻○必○克○策○石○堡○之○得○不○當○所○亡○高○馬○真○以○空
虜○資○論○孫○山○亂○有○萌○可○謂○深○謀○矣○狀○不○能○自○免○於○讒○卒○死○放○地○自
古○忠○賢○工○謀○於○國○則○拙○於○身○多○矣○可○勝○叱○哉
周子珮曰○伸縮随心○自中音節○佳甚

宇文融韋堅楊慎矜王鉷楊國忠

開元中宇文融始以言利得幸於時天子見海內完治偃朕有攘

卻四夷之心融度帝方調兵食故議取隱戶剝田以中主欲利說

一開天子恨得之晚不十年而取宰相雖後得罪而追恨融才有

所未盡也孟子所謂上下征利而國危者不可不信哉天寶以來外

奉軍興內盡豔妃所費愈不貲計於是韋堅楊慎矜王鉷楊國忠

各以衰刻進剝下益上歲進羨絲百億萬為天子私藏以濟橫賜

而天下經費自如帝以為能故重官累使尊顯烜赫朕天下流亡

日多於前有司備員不復事而堅等所欲既充還用權媚以相屠

魯○曰○族○皆○沒○為○天○下○笑○夫○民○可○安○而○不○可○擾○利○可○通○而○不○可○竭○觀○
數○子○乃○欲○擾○而○竭○之○歟○然○基○亡○則○向○所○謂○利○者○顧○不○反○哉○鉅○國○忠○
後○出○橫○虐○最○甚○當○方○毒○天○下○復○思○融○云○
利害禍福原相為倚伏請至權媚相屠浚快好還之速若其隨○
物寫照行乎所以自朕父之化境也

哥舒翰高僊芝封常清

祿○山○東○百○關○驍○虜○乘○天○下○忘○戰○主○德○老○動○故○提○戈○內○諜○人○情○崩○潰○
常○清○乃○驅○市○人○數○萬○以○嬰○賊○鋒○一○戰○不○勝○即○奪○爵○土○欲○入○關○見○天○
子○論○成○敗○事○使○者○三○輩○上○書○皆○不○報○回○斬○於○軍○僊○芝○棄○陝○守○關○過○
賊○西○勢○以○喪○地○被○誅○玄○宗○雖○為○左○右○蒙○瞽○朕○荒○奪○其○明○亦○甚○矣○卒○
使○叛○將○得○籍○口○執○翰○以○降○賊○嗚○呼○非○天○孽○其○惡○使○亂○四○海○舉○黔○首○
而○殘○之○邪○彼○二○將○奚○誅○焉○

柳介侯曰藉口之事朝家絕不可有玄宗處置若此全觀史者
寒戰不已朕卒殘而復完寧非天哉

史記卷一百一十五 李光弼 六才堂

李光弼

李光弼生戎虜之緒沈韜有守遭祿山變拔任兵柄其策敵制勝
不世出賞信罰明士卒爭奮毅狀有古良將風本夫終父喪不入
妻室位王公事繼母至孝好讀班固漢書與夫庸人武夫者及困
於口舌不能以忠自明奄侍內構遂陷嫌隙謀就全安而身益危
所謂工於料人而拙於謀已邪方攘袂徇國天下風靡一為遷延
而田神功等皆不受約束卒以憂死功臣去就可不慎邪嗚呼光
弼雖有不釋位之誅狀諛人為害亦可畏矣將時之不幸歟
弼死於讒讀之髮指狀漢書有張安世二疏傳何不三復也明

二十一史論贊 卷二十六李光弼 五十五

哲之咏自古難之

郭子儀

天寶末盜發幽陵外阻內訌子儀自朔方提孤軍轉戰逐北諡不
 還顧當是時天子西走唐祚若贅旒而能輔太子再造王室及大
 難畧平遭讒甚詭奪兵柄朕朝聞命夕引道無纖介自嫌及被圍
 注陽單騎見虜登以至誠猜恐沮謀雖唐命方永亦由忠貫日月
 神明扶持者哉及光弼等畏偏不終而子儀完名高節爛狀獨著
 福祿永終雖齊桓晉父比之為福唐史臣裴均稱權傾天下而朝
 不忌功蓋一世而上不疑侈窮人欲而議者不之貶嗚呼拍誠知
 言其子孫多以功名顯蓋盛德後云

汾陽德業千古無兩。經歐陽洗發，更覺俊煒。人以文重，果歟。

房瑄

唐名儒多言瑄德。器有王佐材，而史載行事亦少。一舉喪師，訖不復振。原瑄以忠諍自奮，片言悟主，而取宰相。必有以過人者。用違所長，遂無成功。朕盛名之下，為難居矣。夫名盛則責望備，實不副則訾咎深。使瑄遭時承平，從容帷幄，不失為名宰，而倉卒濟難事，敗隙生陷於浮虛，此周之罪名之為累也。戒哉。王晉裔曰：抑揚跌宕神行其間，文久而公名愈盛，其實有以勝之爾。

泌○之○為○人○也○異○哉○其○謀○事○近○忠○其○輕○去○近○高○其○自○全○近○智○卒○而○建○
上○宰○近○立○功○立○名○者○觀○肅○宗○披○榛○莽○立○朝○廷○單○言○暫○謀○有○所○寤○合○
皆○付○以○政○當○此○時○泌○於○獻○納○為○不○少○又○佐○代○宗○收○兩○京○獨○不○見○錄○
寧○二○主○不○以○宰○相○器○之○邪○德○宗○晚○好○鬼○神○事○乃○獲○用○蓋○以○恠○自○置○
而○為○之○助○也○繁○為○家○傳○言○泌○本○居○鬼○谷○而○史○臣○謬○言○好○鬼○道○以○自○
解○釋○既○又○著○泌○數○與○靈○僊○接○言○舉○不○經○則○知○當○時○議○者○切○而○不○與○
有○為○而○朕○繁○言○多○浮○侈○不○可○信○掇○其○近○實○者○著○於○傳○至○勸○帝○先○事○
范○陽○明○太○子○無○罪○亦○不○可○誣○也○

李泌

微言

書法嚴絕

不沒善

王順渠曰。鄴侯之談神仙。猶子房之從赤松。不知者以為詭。其知者以為有所託也。要之君子之所為。衆人固不識耳。文忠實學正。品一切玄虛之事。絕而不取。於必多疑。詞卒著其先機。安儲二節。可以見矣。

崔圖苗晉卿裴冕裴遵慶

孔子稱才難。狀人之才有限。不得皆善。觀圖之銳而失守。出奔晉。卿雅厚而少風采。臧否冕明疆。嗜利不知大體。諛輔政功名不及。治郡狀各以所長顯於時。故聖人使人也。器之不窮。所不能而後為治也。遵慶寡疵。中人之賢與。張無放曰。起伏拖逗之妙。尋之無迹神矣。

崔植崔俊

植○輔○政○當○有○為○之○時○無○經○國○才○優○危○防○淺○機○不○知○其○貴○而○發○也○手
 弛○檻○縶○縱○虎○狼○焉○一○日○而○亡○地○數○千○里○為○天○下○笑○俊○吞○財○資○賊○又
 皆○幸○不○誅○天○以○河○北○亂○唐○故○君○臣○不○肖○悖○繆○其○謀○惜○哉
 誅○絕○之○詞○又○極○風○流○跌宕○才○子○臨○文○無○所○不○可

楊綰崔祐甫柳渾蓋處厚路隋
縮○以○德○服○人○而○人○自○化○可○謂○賢○矣○其○論○議○渾○大○雖○古○王○佐○無○以○加○

祐○甫○發○正○已○隱○情○渾○策○吐○蕃○必○叛○伐○謀○知○幾○君○子○哉○處○厚○事○穆○敬○
文○三○宗○主○皆○弗○類○而○一○納○以○忠○寧○不○謂○以○克○事○君○者○邪○隋○輔○政○十○
年○應○牛○李○訓○注○用○事○無○所○迎○將○善○保○位○哉○

李篤侯曰如入梅檀林片片皆吐香氣公書此當一快也

代宗欲致太平而楊綰以清德相曾不崇朝而黎幹崔寬郭子
儀○翕○狀○而○承○之○非○承○縮○也○承○代○宗○之○道○也○使○縮○之○清○節○不○出○於○
安○而○出○於○強○是○三○人○者○肯○心○服○而○承○之○哉○幹○與○寬○可○強○而○服○也○

子儀可強而服也乎人自化三字描寫入神

元載楊炎王縉實參

元載楊炎各以才資奮適主暗庸故致位輔相若其前闡尹城原
州以謀西夏還左藏有司一租賦以檢制有七誠有取焉狀載本
與輔國以利合險刻著諸心豁壑之欲發乎無戢炎牽連載勢興
醜齋秉國維綱返為載復讎釋言於君卒與妻子併誅暴先骨殛
命於道蓋自取之也夫姦人多才未始不為患故鄧舒以俊死而
鄧析以辯止若兩人者所謂多才者邪縉言福業報應參得君自
私無可論者易稱鼎折足其刑剴諒哉

李卓吾曰元載亦權術可用狀代宗初失國倚恃魚朝恩力而

卒受制於朝恩。及誅魚朝恩。寔得元載力。而卒受制於元載。狀則為人主者亦難矣。不用不得用之。又不得是以郭令公心事如青天白日。人主難遽信也。而况如令公者。古今天下又取希鮮者乎。吁。非大聖人孰能當九五之位歟。姦人多才為患。可作誅心露布。

李栖筠李廓

劉者天德。故孔子稱劉近仁。骨疆接以開冷語有趣四支。故君有忠臣。謂之骨韮。若栖筠。廓二子。其劉者歟。栖筠抗權邪。不及相。廓得相。不願拜。非劉疇克勝之。吉甫踐天宰。謀謨是矣。而鯁正有愧於父云。提劉字立論。骨節珊珊。狀作響。

劉晏第五琦班寵王紹李吳
 生○人○之○本○食○與○貨○而○已○知○所○以○取○人○不○怨○知○所○以○予○人○不○乏○道○御
 之○而○王○權○用○之○而○霸○古○今○一○也○木領劉晏因平準法幹山海排商賈制
 萬○物○低○昂○常○操○天○下○贏○貲○以○佐○軍○興○雖○擊○兵○數○十○年○妙在飲○不○及○民○而
 用○度○足○唐○中○債○而○振○晏○有○勞○焉○可○謂○知○取○予○矣○其○經○晏○辟○署○者○皆
 用○材○顯○循○其○法○亦○能○富○國○云○
 顧○再○裴○曰○此○真○經○濟○大○作○用○非○言○利○小○夫○可○及○

關播董晉

關播舉李元平守汝州。賊縛而臣之。宰相不知人，果可敗國。德宗不以是責宰相，幾喪天下。晉懦弛苟安，滋欲以恩信傾賊，迂暗之人，烏可語功名會哉。君擇相，相擇人，則治反是，則敗喪，因之可不慎歟。

張鎰武元衡李絳姜公輔宋申錫

鎰元衡暴忠王室絳巨德大臣皆為賊姦所乘不殺元身蓋福善禍淫之訓有時而統雖狀賢者於忠諫寧以一不幸遽使慙狀於其心哉要躬可殞而名與岱崧等矣公輔隙開而猶納說焉申錫謀小任大顛沛從之惜乎陳道掌曰勵忠堅善可作臣訓

段秀實顏真卿

唐○人○柳○宗○元○稱○世○言○段○大○尉○大○抵○以○為○武○人○一○時○奮○不○慮○死○以○取
名○非○也○太○尉○為○人○姁○姁○常○低○首○拱○手○行○步○言○氣○卑○弱○未○嘗○以○色○待
物○人○視○之○儒○者○也○遇○不○可○必○達○其○志○決○非○偶○然○者○宗○元○不○妄○許○人
諒○其○狀○邪○非○孔○子○所○謂○仁○者○必○有○勇○乎○當○祿○山○反○哮○噬○無○前○魯○公
獨○以○烏○合○嬰○其○鋒○功○雖○不○成○其○志○有○足○稱○者○晚○節○偃○蹇○為○姦○臣○所
擠○見○碩○賊○手○毅○朕○之○氣○擁○而○不○沮○可○謂○忠○矣○詳○觀○二○子○行○事○當○時
亦○不○能○盡○信○於○君○及○臨○大○節○蹈○之○無○貳○色○何○耶○彼○忠○臣○謫○士○寧○以
未○見○信○望○於○人○要○返○諸○已○得○其○正○而○後○慙○於○中○而○行○之○也○嗚○呼○雖

二十一 史論責

卷二十六 段秀實

六十七

大來堂

[Faint bleed-through text from the reverse side of the page]

千○五○百○歲○其○英○烈○言○言○如○嚴○霜○烈○日○可○畏○而○仰○哉○
分○表○合○贊○一○篇○之○中○三○致○意○焉○公○之○所○存○者○狀○也○

李愬

愬○得○李○祐○不○殺○付○以○兵○不○疑○知○可○以○破○賊○也○祐○受○任○不○辭○決○策○入○
死○以○愬○能○用○其○謀○也○祐○之○才○待○愬○乃○顯○故○曰○平○蔡○功○愬○為○多○
沈○君○房○曰○語○語○古○峭○如○懸○崖○削○壁○不○可○攀○依○
君○臣○將○相○成○功○只○在○知○人○能○用○看○乎○蔡○一○事○具○覘○其○効○

李晟

晟之出東渭橋也。朱泚盜京師。李懷光反咸陽。河北三叛相王李
 納。猶河南李希烈。誣鄭汲。晟無積貲。輸糧提孤軍。抗羣賊。身佩安
 危。而氣不少衰者。後以忠誼感人。故豪英樂為之死耳。至師入長
 安。而人不知。雖三王之佐。無進其能。可謂仁義將矣。嗚呼。功能存
 社祐。不能見信於庸主。卒奪其兵。哀哉。雖朕功蓋天下者。惟退禍
 可以免。四子世似其勞。是宜有後哉。

忠賢仁風。巍朕可仰。退以免禍。可為千古功臣藥石。

二十一 言 卷二十一 馬燧

馬燧渾瑊

唐史臣稱燧沈雄忠力常先計後戰每戰親令於衆無不感際用命關必決死未嘗折北名蓋一時狀力能得田悅而不取虜不可信而決信之故河北三盜卒不臣平涼大臣奔辱燧之罪也雖狀轉○折○古○勁燧賢者也天下以為可責故責之不以功掩罪亦不可以罪廢功○人○繼○瑊親與結贊盟不能料虜詐但以如詔為察始有猛志而無英才乎李晟謂虜不可與盟則燧瑊固出晟下遠甚功名大小信其狀乎

參差曲折亦復淋漓排宕氣昌而角警

二十一 言 卷二十一 馬燧 七十

陸贄

德宗之不止顧不幸哉。在危難時聽贄謀。及已平。追仇盡言。怫狀以讒倖。逐猶棄梗。至延齡輩。則寵任磐桓。不移如山。昏佞之相濟也。世言贄白罷翰林。以為與吳通玄兄弟爭寵。竇參之死。贄漏其言。非也。夫君子小人。不兩進。邪諂得君。則正士危。何可訾耶。觀贄論諫數十百篇。譏陳時病。皆本仁義。可為後世法。炳炳如丹。帝所用。纔十一。唐祚不競。惜哉。

為魏徵易。為狄仁傑難。為仁傑易。而為陸贄更難。蓋徵事明主。仁傑事暴主。而贄事暗主也。

梁州之行求贄不得而帝泣贄不以為說忠州之敗終其身不
還贄不以為已凶不朕則如魏元忠之再相而變其公清裴度
之晚節而安於泛沉皆損其剛方者也贄忠節煥煥獨以諫論
顯耶

韋皋張建封嚴震韓弘

皋建封弘本諸生震興田畝間未有以異人及投隙龍驤皆為國
梁楹光奮一時使不遭遇與庸夫汨汨竝齒而腐可也皋弘雖陰
慮卒能以誠言自解長沒天年空哉
顧鍾星曰切要之言使人感悟

段平仲

君有常尊。臣有定卑。自朕之勢也。朕臣不自通於上。君不降而遠。諸下則治。不得成。而功不彰。迨是而天下之務。繁焉。幾矣。德宗察。蔡欲折伏。臣下自為聰明。而治愈。疏段平仲。一忤上。蒼惶失對。而猶以取名。何哉。下知所職。而上喪其所以為上也。故聖王屈已。從諫。君臣兩得其美。知道之本。歟。

史道隣曰。其義取諸大易。一經點染。何其清嘉溫秀也。

孔巢父穆寧崔柳公綽

巢父恃正義觸羣不肖謀不以權遂喪其身寧邪皆所謂邦之司直者後世卒蕃衍公綽仁而勇於陵方重總沈懿皆有大臣風才堪宰相而用不至果時有不幸邪穆崔柳代為孝友聞家君子之澤遠哉

呂賡虞曰代有孝友堪冠世譜其榮也哉

歸崇敬

韓愈稱郡邑通得祀社稷孔子獨孔子用王者事以門人為配天子以下北面拜跪薦祭禮如親弟子者旬龍棄以功孔子則以德固自有次第崇敬乃請東揖以殺太重方是時公卿無韓愈之賢無有折其非是者道州刺史薛伯高嘗謂夫子稱顏回為庶幾其從於陳蔡者亦各有蹄出於一時後世坐祀十八人以為哲豈夫子志哉觀七十子之賢未有加於十人坐而祀之始於開元非特牽於一時之稱蹄記曰祭有其舉之莫敢廢也如崇敬誠不知禮尊居以媚世歷朝循而不改矣伯高之語柳宗元志之於其書必

有辦其妄者

指之為媚。斥之為妄。所謂見辱於君子萬世而不泯者也。言可不慎哉。

仲尼為聖之至。揚之不加尊。抑之不加損者也。東漢孝章帝幸闕里祠孔子。語孔僖曰。今日之祠榮乎。曰。屈萬乘以重道。主德之輝也。臣何私榮。帝笑曰。非聖後能為是言乎。青史至今。義之崇敬。伯高倡其鄙說。貽譏千古。可笑甚矣。

鄭珣瑜高郢

王叔文雖內連姁尹。外倚姦回。以攘天權。狀是時太子已長。朝無嫌罅。若珣瑜郢與杜佑等。毅狀引東宮監門執退叔文輩。其力不難。顧循嘿苟安。所謂為用彼相者矣。珣瑜一念臥第。與郢佑固位二者亦不足相輕重。陳風人曰。可為不為。非惟無勇。是無識也。不足輕重。呵得痛快。

崔羣

聖○人○不○畏○多○難○畏○無○難○何○哉○多○難○之○世○人○人○長○慮○而○深○謀○日○惕○於○
 中○猶○以○為○未○也○曰○吾○寢○亡○不○暇○又○何○以○安○故○能○舉○天○下○付○之○興○畏○
 之○也○猶○難○已○乎○上○恬○下○嬉○施○施○自○如○曰○賢○難○得○雖○無○賢○尚○可○治○也○
 佞○可○去○雖○存○佞○不○遽○亂○也○視○漏○弗○填○忽○傾○弗○支○偃○狀○自○慰○曰○我○曷○
 以○喪○故○能○舉○天○下○付○之○亡○不○畏○也○常○人○所○畏○聖○人○易○之○所○不○畏○聖○
 人○難○之○觀○孝○明○皇○帝○本○中○主○遭○變○可○與○謀○始○持○成○不○可○與○共○終○崔○
 羣○以○為○相○李○林○甫○則○治○亂○已○分○其○言○信○哉○是○扁○鵲○所○以○謂○桓○侯○也○
 借○曰○字○三○轉○波○巒○而○議○論○雅○飭○老○成○文○史○茲○該○者○矣○

賈耽杜佑杜牧杜棕今狐楚令狐綯

賈○耽○杜○佑○杜○牧○杜○棕○今○狐○楚○令○狐○綯○
 號○佑○楚○皆○惇○儒○大○衣○高○冠○雍○容○廟○堂○道○古○今○處○成○務○可○也○以○大○節○
 責○之○蓋○昏○中○而○玉○表○歟○棕○綯○世○當○國○亦○無○足○譏○牧○論○天○下○兵○曰○上○
 策○莫○如○自○點○賢○矣○哉○
 伍○之○又○曰○彈○撫○悠○然○比○於○化○瑟○

裴延齡 韋渠牟 皇甫鎛

裴延齡引經誼惑其主以不忠為忠德宗倚延齡韋渠牟等尚天下成敗自謂明而卒陷不明君臣回沉可不戒哉憲宗銳於立功而皇甫鎛以聚斂取宰相夫宰相者乃天下選彼轄勞一功烏足勝任哉責之甚故恤之深中興之不終有為而狀

陸王井曰斷以大義君臣交執其咎嚴哉

陽城欲壞白麻而德宗不相延齡李甘欲裂詔書而文宗不相鄭注憲宗柄用利臣時無敢執而爭之者君德之成敗固亦有幸有不幸歟

王叔文王伾劉禹錫柳宗元

叔○文○沾○沾○小○人○竊○天○下○柄○與○陽○虎○取○大○弓○春○秋○書○為○盜○無○以○異○宗
元○等○撓○節○從○之○微○幸○一○時○貧○帝○病○昏○柳○太○子○之○明○規○權○遂○私○故○賢
者○疾○不○肖○者○媚○一○債○而○不○復○宜○哉○彼○若○不○傳○匪○人○自○勵○材○猷○不○失
為○名○卿○才○大○夫○惜○哉

黃○美○中○曰○器○質○性○成○小○雞○魚○大○狀○人○之○自○勵○何○可○不○出○此○也
王○鳳○之○奸○溪○甚○於○石○顯○皇○甫○鑄○之○回○邪○倍○於○叔○文○漢○成○知○惡○石
顯○而○不○知○王○鳳○之○即○石○顯○唐○憲○知○惡○叔○文○而○不○知○鑄○之○即○叔○文
何○其○迷○哉

王叔文

杜黃裳裴均李藩韋貫之

杜○黃○裳○善○謀○裴○均○能○持○法○李○藩○鯁○挺○韋○貫○之○忠○實○皆○足○穆○天○緯○經○
國○體○撥○衰○奮○王○苗○攘○四○方○憲○宗○中○興○寧○不○謂○得○人○而○致○朕○邪○昔○子○
貢○孔○堂○高○第○而○貨○殖○韓○安○國○漢○名○宰○而○資○會○黃○裳○亦○以○受○餉○見○疵○
至○於○忠○烈○羌○朕○則○不○可○掩○已○
王○幼○章○曰○色○奪○鼎○彘○殷○訕○金○石○

劉昌

唐杜牧稱寧陵之圍解。劉玄佐召昌問曰：君以孤城用一當十，何以能守？昌泣曰：始昌令守陣內，顧者斬，昌孤甥張俊守西北，未嘗內顧。梓下斬之士有死志，故能守。因伏地流涕。玄佐亦泣曰：國家將富貴汝，史臣謂不狀，且勅兵乘城與賊抗，所賴惟賞罰耳。今無罪而斬其甥，士心且離，不祥莫大焉。寧好事者傳此，以益其美，非昌志也。牧以為張巡許遠臨睢陽，其名傳，昌全寧陵而事不得暴於世，寧牧未之思邪？

用兵之際，儘有出權事以成功者。殺甥全城，志亦可取。要之史

臣所駁其理長其辭直不能奪也

李光顏

世皆謂李愬提孤旅入蔡縛賊為奇功殊未知光顏於平蔡為多也。是時賊戰日窘盡取銳卒抗光顏憑空堞以居故愬能乘一切勢出賊不意朕則無光顏之勝愬烏能奮哉。唐表臣曰愬之功顯顏之功隱安可無此追論。

裴度

憲宗討蔡出入四年元濟外連姦臣刺宰相及用事者沮駭朝謀
惟天子赫朕排羣議任度政事倚以討賊身督戰遂平淮西非度
破賊之難任度之為難也韓愈頌其功曰凡此蔡功惟斷乃成其
知言哉穆宗不居檢人腐夫乘釁鑄詆而度遂無顯功非前智後
愚用不用勢當朕矣前史稱度擊節頗沈浮為自安計是不朕大
雅曰既明且哲以保其身度何訛云

畢九一曰君斷臣任功以之成知本識大之論
代宗陷於藩鎮之險而未能出惟郭子儀可以出之朕子儀自

陷於朝恩輔國讒波之中。文宗陷於宮寺之險而未能出。惟裴度可以出之。狀度自陷於元禎程昇浸潤之內。狀則二君其如羣小何。二臣其如二君何。信矣。讒之不可去也。魏尚漢之頗牧也。帝棄之而思趙之頗牧。裴度唐之蕭曹也。文宗棄之而思漢之蕭曹。是何異燕薊之人不貴羊酪而貴東南之海物。蕃夷之人不貴璽刻而貴中國之綺繒。居今反古。不自知其蔽也。可笑甚矣。

牛僧孺李宗閔

夫口道先王語。行如市人。其名曰盜。儒僧孺宗閔。以方正敢言。進既當國。反奮私昵黨。排落所憎。是時權震天下。人指曰牛李。非盜謂何。逢吉險邪。稔浮躁。嗣復辯給。固無足言。幸主辱昏。不底於戮。治世之罪人歟。孫謀仲曰。名曰盜。儒醜詆已極。狀有其實矣。當不云苛。

唐興承五代剖分王政不綱文弊質窮蠅混并天下已定治荒
 剔蠹討究儒術以興典憲薰醲涵浸殆百餘年其後文章稍稍可
 述至貞元元和間愈遂以六經之文為諸儒倡障隄末流反刻以
 模刻偽以真狀愈之才自視司馬遷揚雄至班固以下不論也當
 其所得粹狀一出於正刊落陳言橫騫別驅汪洋大肆要之無抵
 悟聖人者其道蓋自此孟軻以荀況揚雄為未淳寧不信狀至進
 諫陳謀排難卹孤矯拂偷末皇皇於仁義可謂篤道君子矣自晉
 迄隋老佛顯行聖道不斷如帶諸儒倚天下正議助為怪神愈獨

喟引聖爭四海之感。雖蒙訕笑。殆而復奮。始若未之信。卒大顯於時。昔孟軻排楊墨。去孔子才二百年。愈排二家。乃去千餘歲。撥真反正。功與齊而力倍之。所以過況。雄為不少矣。自愈沒其言。大行學者仰之如泰山北斗云。

楊誠齋曰：孟子之文辭約而意盡。不為峻刻斬絕之言。而其鋒不可犯也。韓子之文如長江大河。渾狀流轉。魚龍蛟鼉萬狀。惶惑而抑。還蔽掩不使自露。而人望其悠。朕之光。蒼朕之色。亦且畏避而已。論中汪洋大肆。政謂此。

朱勿柱曰：功益子與。是確論。非推高語。

劉黃

漢武帝三策董仲舒。仲舒所對。陳天人大。緊緩而不切也。黃與諸儒皆進。獨譏切宦。宦狀亦太疏直矣。戒帝漏言。而身誦語於廷。何邪。其後宋申錫以謀泄貶。李訓以計不減。死宦者遂疆。可不戒哉。意贊之賢。當先以忠結上。後為帝謀。天下所以安先者。庶其紓患邪。

凡有黃之忠者。不可以無此術。何也。直可也。疏不可也。

李訓鄭注王涯賈鍊舒元興

李訓浮躁寡謀鄭注斬斬小人王涯暗昏舒元興險而輕邀幸天
功寧不殆哉李德裕嘗言天下有常勢北軍是也訓因王守澄以
進雖是良策不見全忠之福乎此時出入此軍若以上意說諸將易如靡風而返以臺府抱關
游徼杭中人以博精兵其死宜哉文宗與宰相李石李固言鄭覃
稱訓稟五常性服人倫之教不如公等朕天下奇才公等弗及也
德裕曰訓曾不得齒後隸尚才之云世以德裕言為朕傳曰國將
亡天與之亂人若訓等持腐株支大厦之顛天下為寒心豎毛文
宗偃朕倚之成功卒為閹謁所乘天果厭唐德哉

李蔚

人之感怪神也甚哉。若佛者特西域一稿人耳。裸顛露足以乞食。
 自資癯辱其身。屏營山樊。行一槩之苦。本無求於人。徒屬稍稍從。
 之。狀其言荒茫漫靡。夷幻變現。善推不驗。無實之事。以鬼神死生。
 貫為一條。據之不疑。培嗜欲。棄親屬。大抵與黃老相出入。至漢十
 四葉書入中國。蹟夫生人之情。以耳目不際為奇。以不可知為神。
 以物理之外為畏。以變化無方為聖。以生而死。死復生。回復償報。
 歌豔其間。為或狀以賤近貴遠為憲。鞮譯差殊。不可研詰。華人之
 譎誕者。又攘莊周列禦寇之說。佐其高層累架騰。直出其表。以無

上不可加為勝。妄相夸脅而倡其風。於是自天子逮庶人。皆震動而祠奉之。初宰相王縉以緣業事佐代宗。於是始作內道場。晝夜梵唄。異襍冠戎。大作孟蘭。肖祖宗像。分供塔廟。為賊臣喜笑。至憲宗世。遂迎佛骨於鳳翔內之宮中。韓愈指言其弊。帝怒。竄愈。瀕死。憲亦弗獲。天年幸福。而禍無亦左乎。懿宗不君。精爽奪迷。復蹈前車而覆之。興衰無知之場。丐庇百解之齒。以死自誓。無有顧籍。流淚拜伏。雖事宗廟上帝。無以進焉。屈萬乘之貴。自等於古。胡數千載而遠。以身為狗。嗚呼。運瘳祚。殫天告之矣。懿不三月而徂。唐德之不競。厥有來哉。悲夫。

書繼以骨。其感滋甚。荆州表過於激。裂此。則以嘻笑為諷。悟人於不覺。

李莊

天子待宰相以不疑。是矣。雖狀於賢不肖。當別白分明。乃可與言。治文宗無知人之明。但以何異土木不疑責宰相。是時善惡混淆。故黨人成於下。主聽亂於上。王室之衰。由此為之。階劉向所云持不斷之慮者。開羣枉之門。殆文宗為邪。英而猜暗。而不疑。兩者皆譏。狀猜主威福繇已。暗君高下隨人。與此毋寧彼。

鄭蔡朱朴韓偓

懿。僖。以。來。王。道。日。失。厥。序。腐。尹。塞。朝。賢。人。遁。逃。四。方。豪。英。各。附。所。
 合。而。奮。天。子。塊。狀。所。與。者。惟。佞。愎。庸。奴。乃。欲。郵。橫。流。支。已。顛。寧。不。
 殆。哉。觀。蔡。朴。輩。不。次。而。用。裨。豚。臠。拒。驅。牙。齧。出。而。已。一。韓。偓。不。能。
 容。況。賢。者。乎。
 塊。狀。二。字。調。笑。甚。於。毒。罵。矣。

盧攜

盧攜之敗王鐸。私高駢。賊遂卷咸鎬。而西。易若舉毛。可謂朝無人
焉。唐將止攜為之。鴟梟。宜天之假手於賊。而磔其枯骨也。

快心語

鄭畋王鐸張濟

唐○之○季○嗣○君○暗○庸○天○穢○其○德○久○矣○
 絳○人○柄○朝○靡○謀○不○乖○如○畋○鐸○皆○
 往○稷○之○才○當○大○過○之○世○為○天○下○唱○扶○支○王○室○幾○致○中○興○俄○而○為○孽○
 豎○亂○官○所○乘○功○業○無○所○成○就○濟○以○亂○止○亂○悖○繆○厥○心○悲○夫○
 恤○鄭○王○悲○張○濟○文○情○壯○憤○

詩云戎狄是膺。荆舒是懲。嫉其為中國之害也。春秋之世。楚滅陳。鄭而卒。復其祀。聖人善之。處存平黃巢。定京師。功冠諸將。昭宗嘗有意都襄陽。依趙凝以自全。大抵唐室屏翰皆為朱溫所翦。霞過於夷狄。荆舒之為害也甚矣。

趙匡凝

許公淵曰：都襄陽避害則可，進取克復則非其宜也。

王重榮

以亂救亂。跋扈者能之。以亂不能救亂。險賊者能之。蓋救亂似霸
 狀而似之耳。故不足與共功。觀王重榮寧不信哉。破黃巢佐李克
 用平京師。若有為當世者。俄而奮私隙。逼天子出奔。雖賊朱玫。仆
 偽襄王。謂曰。定王室實卑之也。身死部將。將手救亂而卒於亂。重榮
 兩得之。不殺朱全忠。而為全忠誅。絕其嗣室矣。餘皆庸奴下材。無
 所訾責云。

一着後手。滿局皆輸。可無識哉。

揚行宥

行宥興賤微及得志仁恕善御衆治身節儉無大過失可謂賢矣。
朕所據淮楚士氣剽而不剛行宥無霸材不能提兵為四方倡以
興王室孰視朱溫劫天子而東謀窮意沮債死牖下可為長太息
矣。

張同人曰無霸材一語斷得心服。

高仁厚田頔朱延壽

全忠唐之盜也。行密志梟其元而後已。田頔使出軍賦而助之。此
 其謀責難而絕之。非忠於唐也。棄所附而覬尊大亦已。妄矣。孔子
 稱孟公綽為趙魏老則優。不可以為滕薛大夫。如仁厚田朱材不
 足為吳蜀之老。可與事天子哉。
 三子定案。非苛求之也。至發明田頔之謀。如鏡如刀。

宋 毆陽修 誤 明 沈國元 閱

列傳

忠義

張巡○先○贊○而○後○入○事○亦○一○法許遠○可○謂○烈○丈○夫○矣以疲卒數萬嬰孤墉抗方張不制之虜
 鯁其喉牙使不得搏食東南牽掣首尾極潰梁宋間大小數百戰
 雖力盡乃死而唐全得江淮財用以濟中興引利償害以百易萬
 可矣巡先死不為遠遠後死不為屈巡死三日而救至十日而賊
 亡天以完節付二人昇名無窮不待留生而後顯也惟宋三葉章

二十一史論贊 卷一百一十七 忠義



二十一 史記卷二十七 大東堂

聖皇帝東巡。過其廟。留駕裴回。咨巡等。雖挺盡節。異代著金石刻。贊明。厥忠與夷。齊餓。蹈西山。孔子稱仁。何以異云。

二公忠烈。不必頌言矣。張真源功在全唐。此贊亦能著之。狀非稟天才。明大義。安能成其奇節。故必合涑水之斷。乃為當爾。

孝友

張士巖父病。藥復鯉魚。冬月冰合。有獺^奇銜魚至前。得以供父。父遂愈。母病癱。士巖吮血。父亡。廬墓。有虎狼依之。焦懷。爾母病。每嘗其唾。若味異。輒悲。孺幾絕。母終。水漿不入口。五日。負土成墳。廬守。日一食。杖狀後。起繼母。沒亦如之。張進昭母患疥刺。左手墮。而終。及殯。進昭截左腕。廬于墓。張公藝九世同居。北齊東安王。永樂隋大。使梁子恭躬慰撫。表其門。高宗有事太山。臨幸其居。問本末。書恐字。以對天子。為流涕。賜纁帛而去。四人名頗著。詳見于篇。伍從父曰錯。落有奇色。峭骨。事與文皆傳。

二十一 史記卷二十七 孝友 二 大東堂

隱逸

唐興賢人在位衆多其適戩不出者纔班班可述狀皆下槩者也
 雖狀各保其素非託默於語足崖壑而志城闕也狀放利之徒假
 隱自名以詭祿仕肩相摩於道至蹄終南嵩少為仕塗捷徑高尚
 之節喪焉故哀可喜慕者類于篇
 盡情賅刺而抑揚之妙尤足沁心接目

循吏

唐興承隋亂離刻被荒荼始擇用州刺史縣令太宗嘗曰朕思天下事丙夜不安枕永惟治人之本莫重刺史故錄姓名於屏風臥興對之得才否狀輒疏之下方以擬廢置又詔內外官五品以上舉任縣令者於是官得其人其功輒著去歎愁就安安都督刺史其職察州縣間遣使者循行天下劾舉不職始都督刺史皆天子臨軒冊受後不復冊狀猶受命日對便殿賜衣物乃遣玄宗開元時已辭仍詣側門候進止所以光寵守臣以責其功初刺史準京官得佩魚品卑者假緋魚開元中又網廢酷吏懲無良羣臣化之羊苟燒

[Faint bleed-through text from the reverse side of the page, including characters like 唐, 興, 承, 隋, 亂, 離, 刻, 被, 荒, 荼, 始, 擇, 用, 州, 刺, 史, 縣, 令, 太, 宗, 嘗, 曰, 朕, 思, 天, 下, 事, 丙, 夜, 不, 安, 枕, 永, 惟, 治, 人, 之, 本, 莫, 重, 刺, 史, 故, 錄, 姓, 名, 於, 屏, 風, 臥, 興, 對, 之, 得, 才, 否, 狀, 輒, 疏, 之, 下, 方, 以, 擬, 廢, 置, 又, 詔, 內, 外, 官, 五, 品, 以, 上, 舉, 任, 縣, 令, 者, 於, 是, 官, 得, 其, 人, 去, 歎, 愁, 就, 安, 安, 都, 督, 刺, 史, 其, 職, 察, 州, 縣, 間, 遣, 使, 者, 循, 行, 天, 下, 劾, 舉, 不, 職, 始, 都, 督, 刺, 史, 皆, 天, 子, 臨, 軒, 冊, 受, 後, 不, 復, 冊, 狀, 猶, 受, 命, 日, 對, 便, 殿, 賜, 衣, 物, 乃, 遣, 玄, 宗, 開, 元, 時, 已, 辭, 仍, 詣, 側, 門, 候, 進, 止, 所, 以, 光, 寵, 守, 臣, 以, 責, 其, 功, 初, 刺, 史, 準, 京, 官, 得, 佩, 魚, 品, 卑, 者, 假, 緋, 魚, 開, 元, 中, 又, 網, 廢, 酷, 吏, 懲, 無, 良, 羣, 臣, 化, 之, 羊, 苟, 燒]

之風爭以惠利顯復詔三省侍郎缺擇嘗任刺史者即官缺擇嘗
任縣令者至宰相名臣莫不孜孜言長人不可輕受亟易是以授
受之間雖不能皆善而所得十五故協氣嘉生薰為太平垂祀三
百與漢相埒致之之術非循吏謂何故條次治室以著厥庸若將
相大臣無以勳閎著者各見本篇不列於茲
陸玉井曰輕受必致亟易吏安得良其弊自不擇始故論申三
致意云
良法美意前史多能道之而一段貞醇古茂潔深峭勁之風惟
公有其全懿天下文章莫大乎是固非浮稱

儒學

嘗論之武為救世砥劑文其膏梁歟亂已定必以文治之否者是
病損而進砥劑其傷多矣朕則武得之武治之不免霸且盜驛人
反是而王故曰武創業文守成百世不易之道也若乃舉天下
之於仁義莫若儒儒待其人乃能光明厥功宰相大臣是已至專
誦習傳授無它大事業者則次為儒學篇
金長民曰亂日少而治日多文學之不可已也自古而朕矣公
持論重事功足翼子輿氏之教

儒學
五

啖助

春秋詩易書由孔子時師弟子相傳。歷暴秦不斷。如系至漢興。刻
 挾書令。則儒者肆狀講授。經典寢興。左氏與孔子同時。以魯史附
 春秋作傳。而公羊高穀梁赤皆出子夏門人。三家言經。各有回舛。
 狀猶悉本之。聖人其得與失。蓋十五義。或繆誤。先儒畏聖人不敢
 輒改也。啖助在唐。名治春秋。據訛三家。不本所承。自用名學。憑私
 臆決。尊之曰孔子意也。趙陸從而唱之。遂顯於時。嗚呼。孔子沒。乃
 數千年。助所推著。果其意乎。其未可必也。以未可必而必之。則固
 持一己之固。而倡茲世。則誣誣與固。君子所不取。助果謂可乎。徒

令後生穿鑿詭辯。詬前人捨成說而自為紛紛。助所階已。固之罪小。誣之罪大。懸此嚴條。後之為助者。亦可以惕息矣。句法連環。媒宥有風吹羅帶之趣。

陳京

德宗啟政。稅間架。借商錢。官市為最甚。順宗為太子。欲極陳之。憊王叔文之諫而止。其畏如此。區區之臣。冒顏而闕說。難哉。其饗國日淺。志不在民矣。憲宗聞冒欽之令。首於賊。臣感憤太息。愛人之至也。及任程昇。皇甫傳諫者不聽。興利之臣。敗君之德甚矣。利臣罪不容誅矣。為之主者。知而不敢言。明而旋復蔽。憲比順更頑冥。貽笑千古。可不鑒哉。文情八轉。抑揚曲直。極頓挫跌宕之妙。古鬱溫潤。簡而能腴。

二十一 論 卷二十七 陳京 七

文藝

唐有天下三百年。文章無慮三變。高祖太宗大難始夷。汾江左餘
 風。絳句繪章。揣合低卬。故王楊為之伯。玄宗好經術。羣臣稍獻雕
 琢。索理致崇雅。黜浮氣益雄渾。則燕許擅其宗。是時唐興已百年。
 諸儒爭自名家。大曆正元間。美才輩出。嚆濟道真。涵泳聖涯。於是
 韓愈倡之。柳宗元李翱皇甫湜等和之。排逐百家。法度森嚴。抵轆
 晉魏上軌。漢周唐之文。完狀為一。王法此其極也。若侍從酬奉。則
 李嶠宋之問。沈佺期王維。制冊則常袞。楊炎。陸贄。權德輿。王仲舒。
 李德裕。言詩則杜甫李白。元稹白居易。劉禹錫。譎怪則李賀。杜牧。

文藝

文藝

文藝

[Faint bleed-through text from the reverse side of the page, including characters like '文藝', '唐', '高祖', '太宗', '玄宗', '韓愈', '柳宗元', '李翱', '皇甫湜', '王維', '白居易', '劉禹錫', '李賀', '杜牧']

李商隱皆卓然以所長為一世冠其可尚已。夫嘗言之。夫子之門。以文學為下科。何哉。蓋天之付與於君子。小人無常分。惟能者得之。故一藝自中。智以還。持以取敗者。有之。朋姦飾偽者。有之。怨望訕國者。有之。若君子則不狀。自能以功業行實。光明於時。亦不一於立言。而垂不腐。有如不得試。固且闡釋優游。異不及排。怨不及誹。而不忘納君於善。故可貴也。今但取以文自名者。為文藝篇。若韋應物。沈亞之。關防。祖詠。薛能。鄭谷等。其類尚多。皆斑斑有文在。人間。史家逸其行。事故弗得而述云。

他蒼嚴澹永色味俱佳

漢以經術造士。其敷唱儒術。緣飭吏事。非不有得也。然阿附從容。諂諛順旨。則弱天下之氣矣。唐以詞章取士。其鶴膝蜂腰。錦心綉口。非不可喜也。取青偶白。駢四儷六。則破天下之氣矣。文以氣為主。闕極世運盛衰。可不慎乎。又記。

文苑

杜甫

唐興詩人承陳隋風流浮靡相矜至宋之間沈佺期等研揣嚴音
 浮切不差而蹄律詩競相韻沿逮開元間稍裁以雅正狀恃華者
 質反好麗者壯達人得一際皆自名所長至南渾涵汪茫千彙萬
 狀兼古今而有之它人不足甫乃馭餘殘膏賸馥沾丐後人多矣
 故元稹謂詩人以來未有如子美者甫又善陳時事律切精深至
 千言不少哀世蹄詩史昌黎韓愈於文章慎許可至歌詩獨推曰
 李杜文章在光焰萬丈長誠可信云

沈勁雨曰精卓妍美居狀風雅之宗譽不失實是李杜知己

引元韓二名公之言為証。文有墻壁。甫以詩專家。乃得立極。千古。今人無所不學。卒取效顰之譏。殊為可笑。

方技

凡推步卜相醫巧。皆技也。能以技自顯於一世。亦悟之。天非積習。致狀。狀士君子能之。則不迂。不泥。不矜。不神。小人能之。則迂而入。諸拘礙。泥而弗通。大方矜以夸衆。神以誣人。故前聖不以為教。蓋吝之也。若李淳風。諫太宗不濫誅。許胤宗不著方劑書。嚴謨諫不合乾陵。乃卓狀有益於時者。茲可珍也。至遠。知果撫等。詭行幻怪。又技之下者焉。技以人重。洵為宏論。

唐興風化烈女陶淬且數百年而不必聞家姓窈窕淋女至臨大難守禮
 節白及不能移與哲人烈士爭不朽名寒如霜雪亦可貴矣今采
 獲尤顯行者著之篇以緒正父父子子夫夫婦婦之懿云
 伍連城曰只玩其起繳知本見大卓狀名言

外戚

冒語大而實警

凡外戚成敗視主德何如主賢則共其榮主否則先受其禍故太
 宗檢貴倖裁賞賜貞觀時內里無敗家高中二宗柄移豔私產亂
 朝廷武韋諸族耄嬰頭血一日同汙鉄及玄宗初年法行近親裏
 表脩教天寶奪明委政妃宗階召反虜遂喪天下楊氏之誅噍類
 不遺蓋數十年之寵不償一日之慘甲第厚賞無救同坎之悲寧
 不哀哉代德而降閹尹參嬖後宮雖多無赫赫顯門亦無刀鋸大
 戮故用福甚者得禍酷取名少者蒙責輕理所固狀若乃長孫無
 忌之功武平一之識吳淑之忠弗緣內寵者自見別傳云

立言貴有體要。起手四語。已挈其案。通篇叙議相間。峯迴路轉。文境悠深。又層層照應前冒。局法完密。故佳。

唐制內侍省官。有內侍四。內常侍六。內謁者監內給事各十。謁者十二。典引十八。寺伯寺人各六。又有五局。一曰掖廷。主宮嬪薄寢。二曰宮闈。扈門關。三曰奚官。治宮中疾病死喪。四曰內僕。主供帳。五曰內府。主中藏給納。局有令有丞。皆官者為之。太宗詔內侍省不立三品官。以內侍為之長。階第四。不任以事。惟門閤守禦。廷內掃除稟食而已。武后時稍增其人。至中宗黃衣乃二千員。七品以上員外置千員。朕衣朱紫者尚少。玄宗承平財用富足。志大事奢。不愛惜賞賜爵位。開元天寶中宮嬪大率至四萬。官官黃衣

官者

唐制內侍省官。有內侍四。內常侍六。內謁者監內給事各十。謁者十二。典引十八。寺伯寺人各六。又有五局。一曰掖廷。主宮嬪薄寢。二曰宮闈。扈門關。三曰奚官。治宮中疾病死喪。四曰內僕。主供帳。五曰內府。主中藏給納。局有令有丞。皆官者為之。太宗詔內侍省不立三品官。以內侍為之長。階第四。不任以事。惟門閤守禦。廷內掃除稟食而已。武后時稍增其人。至中宗黃衣乃二千員。七品以上員外置千員。朕衣朱紫者尚少。玄宗承平財用富足。志大事奢。不愛惜賞賜爵位。開元天寶中宮嬪大率至四萬。官官黃衣

以上三千員衣朱紫千餘人其稱旨者輒拜三品將軍列戟於門其在殿頭供奉委任華重持節傳命光焰殷殷動四方所至郡縣奔走獻遺至萬計修功德市禽鳥一為之使猶且數千緡監軍持權節度成何體出其下於是甲舍名園上腴之田為中人所名者半京畿矣肅代庸弱倚為扞衛故輔國以尚父顯元振以援立奮朝恩以軍容重狀猶未得常主兵也德宗懲艾泚賊故以左右神策天威等軍委官者主之置護軍中尉中護軍分提禁兵是以威柄下遷政在官人舉手伸縮便有輕重至慄士奇材則養以為子巨鎮疆藩則爭出我門小人之情猥險無顧籍又日夕侍天子狎則無

威習則不疑故昏君蔽於所昵英主禰生所忽玄宗以遷崩憲敬以弒頌文以憂債至昭而天下止矣禍始開元極於天祐凶懷參會黨類殲滅王室從而潰喪辟猶灼火攻蠹盡木焚詎不哀哉跡其殘氣不剗柔情易遷執則無上怖則生怨借之權則專為禍則迫而近緩相攻急相一此小人常勢也噫梟狐不神天與之昏未如亂何故取中葉以來宦人之大者粹之篇

典而核快而切小人之禍以漸而極殊動履霜之戒

東漢宦官之禍始於鄭衆李唐宦官之禍始於高力士而唐之禍尤甚於漢漢之禍及於士大夫唐之禍及於天子何者在漢

論
宦者
十五

則使之預政。在唐則使之掌兵。其禍之重。輕固若此也。

馬存亮

楚鄒公辛不敢讎君而忘父。寃昭愍之世。兩軍寵遇有厚薄。而卒
用存亮夷難。功莫及者。自古忠臣出於疏斥。不用益多矣。存亮豈
通記書道理之人邪。何其識君臣大誼。明甚不尸大勞。畏權處外。
又愈賢矣。與夫書龍蛇之詩者。何其小哉。
深予之辭。不難過抑。前芳文人多有此習。

[Faint bleed-through text from the reverse side of the page]

宦者傳後

袁紹誅常侍以逞。而曹操移漢。崔丞相血軍容。甘心焉。而未沍篡。唐大抵假威柄於外。以內攘奸人。則大臣專王室。卑矣。漢唐相去。五百歲。產亂取亡。猶蹈一轍。非天所廢。而人謀。洄刺乃狀邪。計瞻兮曰。距狼進虎之喻。未若此論之明切也。

酷吏

太宗定天下留心聽斷著令州縣論死三覆奏京師五覆奏獄已決尚芋狀為徹膳止樂至晚節天下刑幾措是時州縣有良吏無酷吏武后乘高中懦庸盜攘天權畏下異已欲脅制羣臣搢翦宗支故縱使上飛變構大獄時四方上變事者皆給公乘所在護送至京師稟於客館高者蒙封爵下者被賚賜以勸天下於是索元禮來俊臣之徒揣后密旨紛紛並興澤吻磨牙噬紳纓若狗豚狀至叛尚臭達道路冤血流離刀鋸忠鯁貴疆之臣朝不保昏而后因以自肆不出幃闥而天命已遷猶慮臣下弗懲而六道使始出

矣○至○載○初○右○臺○御○史○周○矩○諫○后○曰○凶○人○告○許○遂○以○為○常○推○刻○之○吏○
以○嶮○責○痛○詆○為○功○鑿○空○投○隙○相○矜○以○殘○泥○耳○籠○首○枷○楔○兼○暴○拉○脅○
籤○瓜○懸○髮○熏○目○蹄○曰○獄○持○晝○禁○食○夜○禁○寐○敲○撲○撼○搖○使○不○得○瞑○蹄○
曰○甯○曰○人○苟○賒○死○何○求○不○得○陛○下○不○諒○試○取○告○牒○判○無○驗○者○使○推○
其○情○有○自○必○上○下○其○手○希○合○盛○旨○今○舉○朝○脅○息○謂○陛○下○朝○與○為○密○
乃○與○為○讎○一○罹○攝○逮○便○與○妻○子○決○且○周○用○仁○昌○秦○用○刑○止○惟○陛○下○
察○之○后○寤○獄○乃○稍○息○而○酷○吏○寢○寢○以○罪○去○天○寶○後○至○肅○代○間○政○類○
事○叢○奸○臣○作○威○渠○檢○宿○伎○頗○用○慘○刻○奮○狀○不○得○如○武○后○時○敢○搏○擊○
人○哉○矣○嗚○呼○非○吏○敢○酷○時○誘○之○為○酷○觀○俊○臣○輩○怵○利○放○命○內○懷○滔○

天○又○張○湯○郵○都○之○土○宜○云○

昏○暴○之○朝○始○有○婪○酷○之○臣○歷○稽○往○牒○百○不○失○一○論○云○非○吏○敢○酷○
時○誘○之○為○酷○非○為○彼○開○一○面○政○深○責○乎○其○上○之○辭○也○詳○覽○篇○局○
有○體○有○情○允○稱○雅○正○之○構○

藩鎮

安史亂天下，至肅宗大難畧平，君臣皆幸安。故瓜分河北地，付授
 叛將，護養孽萌，以成禍根。亂人乘之，遂擅署吏，以賦稅自私。不朝
 獻於廷，效戰國胼胝相依。以土地傳子孫，脅百姓加鋸其頸。利林
 逆汗，遂使其人自視由羌狄狀。一寇死一賊生，訖唐亡百餘年。卒
 不為王土，當其盛時，蔡附齊連，內裂河南地為合從，以抗天子。杜
 牧至以山東王，不得不王，霸不得不霸，賊得之故，天下不安。又曰
 厥今天下何如哉？干戈朽，鉄鈍舍，悉混貸，照盲逆孽，殆為故常。
 而執事大人，曾不歷算，周思以為宿謀，方且嵬岸抑揚，自以為廣

大繁昌莫已若也。嗚呼！其不知乎！其俟塞頓顛傾而後為之支計乎？且天下幾里，列郡幾所，自河以北，蟠城數百，角奔為寇，伺吾人顛頽，天時不利，則將與其朋伍，駭亂吾民於掌股之上。今者及吾之壯，不圖擒取，乃偷處恬逸，以為後世子孫皆魯疽根，此復何也？議者曰：「屈疆之徒，吾以良將勁兵為銜策，高位美爵充飽其腸，安而不撓，外而不拘，猶秦虎狼而不拂其心，則忿氣不萌，此大曆貞元所以守邦也。何必疾戰焚煎吾民，朕後為快也。」愚曰：大曆貞元之間，有城數十，千百卒夫，則朝廷貸以法，故於是濶視大言，自樹一家，破制削法，角為尊奢，天子不問，有司不呵，王侯通爵，越錄受

之，覲聘不來，几杖扶之，逆息虜獯，皇子嬪之地，益廣兵益彊，儲擬益甚，侈心益昌，土田名器，分割大盡，而賊夫貪心未及，畔岸淫名越蹄走兵四畧，以飽其志，趙魏燕齊同日而起，梁蔡吳蜀躡而和之，其餘混瀆軒囂，欲相效者，徃徃而是，運遭孝武，前英後傑，夕思朝議，故能大者誅鉏，小者惠來，大抵生人油狀多欲，欲而不得，則怒怒則爭，亂隨之，是以教答於家，刑罰於國，征伐於天下，裁其欲而塞其爭也。大曆貞元之間，反此提區區之有而塞無涯之爭，是以首尾指支，幾不能相運掉也。凡今者不知非此而反用以為經，將見為盜者非止於河北而已。嗚呼！大曆貞元守邦之術，永戒之。

論
卷二十七
鎮
二十一

哉。魏博傳五世。至田弘正。入朝。十年復亂。更四姓。傳十世。有州七。
 成德更二姓。傳五世。至王承元。入朝。明年王庭湊反。傳六世。有州
 四。盧龍更三姓。傳五世。至劉總。入朝。六月朱克融反。傳十二世。有
 州九。淄青傳五世。而滅。有州十一。滄景傳三世。至程權。入朝。十六
 年。而季全畧有之。至其子同叔。而滅。有州四。宣武傳四世。而滅。有
 州四。彰義傳三世。而滅。有州三。澤潞傳三世。而滅。有州五。雖朕迹
 其由來。事有因籍地之輕重。視人謀滅否。歟。今取擅興若世嗣者。
 為藩鎮傳。若田弘正。張孝忠等。暴忠納誠。以屏王室。自如別傳云。
 唐之立國。女后淫虐於前。胡維傾敗於後。閹宦濁亂於中。藩鎮

跋扈於外。而又以盜賊剪殄其宗。自古國家之多故。未有若此
 之慘者。豈非作法之不滅。有自來乎。公歷指其君臣幸安自得
 之狀。足令後人嚙指相戒。

魏傳

田承嗣幾禽矣。李寶臣怒承倩而釋魏。建中之際。三將軍持銳。血功無成者。四叛連勢。兵結難作。天子不能守宗廟。傳及弘正。去汗入朝。數年復亂。唐終不得魏。與夫墜刀亂齊。孰為輕重。沈彥方曰。魏非唐之魏乎。終不得一語。特書也。亦微辭也。

二十一史論贊
卷二十七
魏傳
二十三
大東堂

[Faint bleed-through text from the reverse side of the page]

鎮冀

朱。滔。王。武。俊。南。面。稱。王。地。聯。友。昵。及。泚。僭。天。子。滔。將。應。之。當。時。危
 矣。賈。林。以。一。語。寤。武。俊。軋。兵。相。仇。折。幽。薊。之。銳。泚。失。其。朋。不。出。孤
 城。終。底。寢。夷。用。林。之。功。賞。不。及。身。德。宗。為。不。明。哉。
 林。得。此。贊。即。不。賞。猶。得。與。子。推。存。周。玆。著。天。壤。庸。何。傷。

二十一史論 卷二十七 鎮冀 二十四

盧龍

朱滔脅其兄泚入朝及引兵東嚮稱帝以自尊名雖助泚志可知矣至元融再得幽州朱氏無遺種其禍與泚鈞而族夷有先後為明也

明戒之辭曲折有致

宣武彰義澤潞
歸咎君相是春秋正義

宣武彰義澤潞

傳稱作易者其知盜乎。狀則盜之情非聖人不能知。唐中哀姦雄
圖。睨而奮舉。魏趙燕之地。葬為盜區。挈叛百年。夷狄其人。而不
復昏上庸佐。惟不知盜。故也。引妖就暝。以奪厥明。寧蕭倪崔植等
謂耶。

歸咎君相是春秋正義

史記卷一百一十五 匈奴列傳第五十五 匈奴列傳第五十五

突厥二

隋季世虛內以攻外生者罷道路死者暴原野天下盜賊共攻而
亡之當此時四夷侵中國微而突厥竄疆控弦者踣百萬華人之
失職不逞皆往從之甚之謀導之入邊故頡利自以為疆大古無
有也高祖初即位與和因數出軍助討賊故詭臣之贈予不可計
虜見利而動又與賊連和殺掠吏民於是掃國入寇薄渭橋騎蓋
蒙京師太宗身勅兵顯責而陰間之戎始內阻不三年縛頡利獻
北闕下霆掃風除其國遂墟自詩書以來伐暴取亂蔑如帝神且
速也秦漢比之陋矣狀帝數暴師不告勞料敵無遁情善任將必

史記卷一百一十五

突厥

二十七

大來堂

其功蓋黃帝之兵也。而突厥乃以失德抗有道。漢哀當始興。雖運之盛衰屬於天。而其止信有由矣。寫馭虜得策。千古如觀文。更有氣韻。

吐蕃

唐興四夷有弗率者。皆利兵移之。鑿其牙。犁其廷。而後已。惟吐蕃回鶻。踣疆雄為中國患。家久。贊普遂盡盜河湟。薄王畿。圍東境。犯京師。掠近輔。殘馘華人。謀夫虓師。圍視共計。卒不得要領。晚節二姓自亡。而唐亦衰焉。夫外撫內寧。惟聖人不讓。玄宗有逸德。而振地太大。務遠功。忽近虞。逆賊一奮。中原分裂。訖二百年。不得復完。而至陵夷。狀則內先自治。釋四夷為外懼。守成之良資也。吳伯昭曰。外寧必有內憂。故專意於自治。王者不治夷狄。豈忽之也哉。守成亦不易。其在斯乎。

回鶻

夷狄資悍貪人外而獸內惟剽奪是視故湯武之興未嘗與共功
 蓋疏而不戚也太宗初興嘗用突厥矣不勝其暴卒縛而臣之肅
 宗用回紇矣至畧華人辱太子管殺近臣求索無倪德宗又用吐
 蕃矣劫平涼敗上將空破西陲所謂引外禍平內亂者也夫用之
 以權制之以謀惟太宗能之若二主懦昏狃而狎之烏勝其弊哉
 彼親之則責償也多憚而不滿則滋怨化以仁義則頑示以法則
 忿熟我險易則為患也博而慘療餒以野暮何時可哉故春秋許
 夷狄者不一而足信矣

二十一 史論續

卷二十一 回鶻

二十九

大來堂

[Faint bleed-through text from the reverse side of the page, including characters like '中國', '回鶻', and '突厥']

巢端明曰夷狄性情最難制化寫得淋漓痛快

沙陀

沙陀始歸命天子仰哺於邊世喋血助征討常為邊兵雄至克用
逢王室亂遂有太原虜性惇固少它腸自負材果欲經營天下而
不克也兵雖勝狀數敗地雖得輒復失故熟視帝劫遷縮頸羞汗
偷景待僵不亦鄙乎賴其子慄銳抑而復振是時提兵託勤王者
五族狀卒亡朱氏為唐滌耻者沙陀也使克用稍知古今能如齊
桓晉文唐遽亡乎哉

龔當時曰克用有桓文之資而自蹈偷鄙之轍不學之故也堪
為武人捧喝贊中抑之引之采壯思柔

契丹

唐之德大矣。際天所覆，悉臣而屬之。薄海內外，無不州縣。遂尊天子曰天可汗。三王以來，未有以過之。至荒區，君長待唐，壘燾乃能國。一為不賓，隨輒夷縛。故蠻瑛夷寶，踵相逮於廷。極熾而哀，厥禍內移。天寶之後，區夏疲破。王官之威，北不踰河。西止秦邠，凌夷百年。逮於亡，顧不痛哉。故曰治已治人，惟聖人能之。

李篤侯曰：說到衰時，風雨暴至，令人淒狀欲泣。文章能移性情，此類是也。

平生元立臨淮之命出於天子權於保臬汾陽為優此乃聖賢遲
○又轉到汾陽○引○周○公○以○
疑成敗之際也世稱周邵為百代之師周公擁孺子而邵公疑之
○疑○其○肯○何○善○筆○力○
以周公之聖邵公之賢少事文王老佐武王能平天下周公之心
邵公且不知之苟有仁義之心不資以明雖邵公尚爾況其下哉
嗟乎不以怨毒相甚而先國家之憂晉有祈奚唐有汾陽保臬孰
謂夷無人哉
借汾陽形出保臬極占地步史公予善之辭惟恐其有未盡也
語語帶生氣蒼蔚古朴風力不讓秦漢間人

西域

西方之戎古未嘗通中國至漢始載烏孫諸國後以名字見者寔
多唐興以次修貢蓋百餘皆冒萬里而至亦已勤矣朕中國有報
贈冊帛程糧傳驛之費東至高麗南至真臘西至波斯吐蕃豎昆
北至突厥契丹靺鞨謂之八蕃其外謂之絕域視地遠近而給費
開元盛時稅西域商胡以供四鎮出北道者納賦輪臺地廣則費
倍此盛王之鑒也
陸王井曰厚往之費以漸說入次第遠迤至末急繳一語極相
規之益

南蠻二

唐北禽頡利、西滅高昌為耆、東破高麗、百濟、威制夷狄、方策所未有也。交州、漢之故封、其外瀕海諸蠻、無廣土堅城、可以居守。故中國兵未嘗至。及唐稍弱、西原黃洞、繼為邊害、垂百餘年。及慮生所忽其亡也、以南詔詩曰：惠此中國、以綏四方、不以夷狄先諸夏也。禁制於此、患生於彼、凡事皆然。王者不治夷狄、深有見於斯也。結束警哨、小篇之冠。

[Faint bleed-through text from the reverse side of the page]

姦臣

木將壞。蠶實生之。國將亡。妖實產之。用韻語故三宰嘯凶。祀奪辰。林甫將
蕃黃屋奔。鬼質敗謀。興元感。崔柳倒持。李宗覆。嗚乎。有國家者。可
不戒哉。危險之音。節險而啟楚。

叛臣僕固懷恩李懷光

懷恩與賊百戰，闔宗死事，至四十六人，遂汎掃燕趙，無餘埃，功高
 威重，不能防患，凶德根於心，弗得其所，輒發果於犯上，愒哉其母
 拔刀逐賊，烈婦人也。懷光提萬眾，振天子於難，一為讒人，所沮忿
 戾，不自還身，首殊分狀，讒人亦可疾矣。所謂交亂四國者也。
 所載人事頗多，贊中以百字囊括之，可謂密而整者矣。李卓吾
 論二人乃心王室，區區之心，無以自明，不能低頭就戮，甘心於
 讒臣之口，遂發憤至此，非可與逆賊同此倫也。此憤語亦公評
 也。○堪與史贊互相發明。

叛臣李錡

語曰、出入之吝、謂之有司、賤之也。德宗平朱泚、京師府藏耗竭、諸道始有進奉、助經費、而詔書亦往往宣索於天下、以人主規規財利、下行有司之事、天下無事、賦取猶不息。劍南、江西、有日月之進、杜亞、劉贊、王緯、及錡、歲時進奉、以固其寵、號稱賦外羨、餘又亦託中旨、以盜庫物、狀獻、纔十二三、餘皆私之。江淮以南、物力大屈、人樵然忘生、貞元以後、中官市物、都下謂之宮市、不持符牒、口含詔命、取濫、繡、惡布、紅紫之倍、其估裂以償、直市之良賈、精貨皆逃去、不出、列屋閉者、惟粗雜苦窳而已。又有疆驅、又禁中、罄所車輦、

[Faint bleed-through text from the reverse side of the page, mostly illegible.]

賣者不平。因共歐笞之。蒼頭女奴名馬工車。惴惴常畏捕取。而德宗蔽於左右。前後莫知也。故善貞因錡并論其事。卒不知錡顯鹽鐵之利。以養兵。昌叛。曾不及應。有司之吝遠甚。

姚仙期曰。王者不言利。朕利權又不可假人。讀此當知其故。又知所以制之法矣。

逆臣

祿山思明興。夷奴餓。倖假天子恩幸。遂亂天下。彼能以臣反君。而其子亦能賊殺其父。事之好還。天道固朕。朕生民厄會。必假手於人者。故二賊暴興。而亟滅。張謂譏劉裕。近希曹馬。遠棄桓文。禍徒及於兩朝。福未盈於三載。八葉傳其世嗣。六君不以壽終。天之報施。其明驗乎。杜牧謂相工稱隋文帝當為帝者。後篡竊果得之。周未。楊氏為八柱國。公侯相襲久矣。一旦以男子偷竊位號。不三二十年。於老嬰兒。皆不得其死。彼知相法者。當曰。此必為楊氏之禍。乃可為善相人。張杜確論。至今多稱誦之。如祿山思明希劉裕楊

堅而不至者是以著其論
許仁百曰稱引明譏頗有詼諧之趣

逆臣末


唐亡諸盜皆生於大中之朝太宗之遺德餘澤去民也久矣而賢
臣斥死庸懦在位厚賦深刑天下愁苦方是時也天將去唐諸盜
竝出歷五姓兵未嘗少解至宋狀後天下復安漢之亡也天下大
亂至晉狀後稍定晉之亡也天下大亂至唐狀後復安治少而亂
多者古今之勢盛王業業以求治可少忽哉
孫謀仲曰結語掉出正旨令人躍狀

論續 卷二十一 逆臣末 四十

[Faint bleed-through text from the reverse side of the page]

逆臣傳黃巢

廣明元年、巢始盜京師、自陳唐去丑口、而著黃明、黃且代唐也。嗚呼、其言妖歟。後巢死、秦宗權始張、株亂徧天下、朱溫卒攘神龍、有之大氏皆巢黨也。寧天託諸人、告亡於下乎。成石生曰：半疑半信、姿韻獨絕。



Handwritten mark or characters at the top left of the left page.

Small handwritten mark on the left page.

Small handwritten mark on the left page.

Handwritten characters at the top right of the right page.

Faint, illegible text in columns on the right page, likely bleed-through from the reverse side.

Vertical text along the right edge of the book, possibly a page number or title.

